

Inatsisissatut siunnersuummut nassuiaatit

-

**Nalinginnaasumik nassuiaatit**

1. Inatsisissatut siunnersuummut tunuliaqutaasq

Naalackersuisut isumaqarput katissimallutik aappariinnik akileraartarnermut tunngasutigut naligiissitsinerup eqqunneqarnissaanut piffissanngortoq, taamaammallu siunnersuutigineqarpoq, katissimallutik aappariinnik ataatsimut akileraarusersuisoqartarnera atorunnaarsinneqartariaqartoq. Naalackersuisulli isumaat naapertorlugu tamanna ilaatigut ullumikkumut naleqqiullugu akileraarutitigut inissisimanermit ajornerulersitsinnginnissaanik iliuuseqarnikkut pissasoq. Naalackersuisullu aamma isumaqarput, siunissami selskabinik akileraarusiisarnissaq siunissamut isumannaarsaaviginiarlugu akileraartarnermik atonerluiniartarnernut illersuutissanik pilersitsinissaq pisariaqartoq, taamaaliornikkut selskabit peqatigiiffiit il.il. namminneerlutik Kalaallit Nunaannut selskabit akileraarutaannik akiliuteqarnissaminnik namminneerlutik aalajangersaasaqqunagit. Taamaaliornikkut siunissamut selskabit akileraaruserneqartarnissaannik isumannaarsaviginiarlugu Naalackersuisut siunnersuuteqarput, nuussinermi akeqartitsineq (selskabit piginneqatigiissut iluminni nuutsinerinut akeqartitsineq), annikitsumik aningaasannguisarneq (selskabit imminnut pigisut aningaasanik attartortarnerinut) kiisalu CFC-mik akileraarusiisarneq (selskabit iluminni niueqatigiillutik akitigut nuussisarnerinut atatillugu) akileraarusersuisarnerup iluarsaassivigineqartariaqarneranik atuutilersinneqartariaqarnerannillu iliuuseqarnissamik.

2. Inatsisissatut siunnersuutip imarisai

2.1. Katissimallutik aappariit ataatsimut akileraaruserneqartarnerata atorunnaarsinnera.

Aaappariit immikkut akileraarusigaanissaannik siunnersuut saqqummiunneqartoq naatsumik imatut oqaatigineqarsinnaavoq:

1) Aappariit tamarmik immikkut ikittuinnartigut pinngitsoorfissaqartumik isertitaminnik aningaasartuutiminnillu nammineerlutik nalunaaruteqartassapput aappariinneq pillugu inatsiseqartitsinermit tamanna pillugu aalajangersakkat naapertorlugit.

2) Aappariit tamarmik immikkut namminneq ilanngaatisarisatik piginnassavaat.

3) Aappariit tamarmik immikkut aallaaviusumik namminneq isertitarisatik naapertorlugit akileraassapput. Akileraarutilli naatsorsorneqarneranni ataatsimut akileraaruteqaataasussat arlaqartut ingerlatiinnarneqarput.

4) Ataatsimut akileraaruteqaataasussat arlaqartut, aappariit ukiup aningaasarsiorfiusup naanerani inooqatigiippata, atorneqassapput, t.i. ukiumi aningaasarsiorfiusu-mi katiffiusumi atorneqassallutik, ukiumili aappariinnerup atorunnaarfigisaani atorneqassanatik.

Ataatsimut akileraaruteqaataasussat allat aatsaat atorneqassapput, aappariit ukioq aningaasarsiorfiusooq tamaat inooqatigiissimappata, tamannalu qaammatini aqqaneq marlunni pisimassalluni. Taamaattumillu malittarisassat ukiumi aningaasarsiorfiusumi aappariilerfiusumi aviffiusumiluunniit atorneqarsinnaanatik, taamaattorli ukiorpi pineqartumi katinneq 1. januarimi pinngippat avinnerluunniit 31. decemberimi pinngippat. Kiisalu aamma ataatsimut akileraaruteqaataasussat ataasiakkaanut tunngatil-lugu malittarisassanut atuuttuusunut atatillugu piffissami pisoqarfiusup nalaani aap-pariit inooqatigiinnersut apequtaatinneqarluni.

Aappariinnik akileraarusiinnermut malittarisassat aamma nalunaarsukkamik inooqatigiinneq pillugu inatsisip Kalaallit Nunaanni atuutilernissaa pillugu peqqussut nr. 320, 26. april 1996-imeersoq naapertorlugu, Kalaallit Nunaannut inatsit atuuttoq nalunaarsukkamik inooqatigiinnut atuupput.

Aappariit tamarmik immikkut isertitaminnit akileraassappata, isertitat aningaasartuutillu aappariit akornanni qanoq agguaanneqarnissaannik aalajangiisuusunik malittarisassaqaarnissaq pisariaqarpoq. Siunnersuutigineqarpoq, pisuussutitigut isertitat, aapparisami, aappariinneq pillugu inatsiseqartitsineq malillugu, pisuussummut oqartussaassuseqartup akileraarutaasussanik isertitaanik naatsorsuinnermi ilaatinneqassasut, pisuussutitigullu aningaasartuutitut tunngatillugu, akiliinissamat pisussaaffeqartumi. Pisuussutitigut isertitat imaluunniit pisuussutitigut aningaasartuutit, aappariinni sorlermut tunngasuunersut aalajangerneqarsinnaanngippat, aappariit tamarmik immikkut tamakkua affaat naatsorsuinnerminni ilanngutissavaat.

Isertitat inuussutissarsiummik suliffimmut tunngasuuppata, aapparisaasumi suliffimmik inuussutissarsiutigalugu ingerlatsisuusumi akileraarutaasussanik isertitat naatsorsorneqarneranni ilanngunneqassapput, aappariinni sorliup kiap suliffeqarfik pigineraa apequtaatinnagu. Aappariit marluullutik tamarmik suliffimmik ingerlatseqataappata, isertitat aappaasumi annertunerpaamik inuussutissarsiutigalugu suliffimmik ingerlatsisuusumi ilanngunneqassapput.

Siunnersuutigineqarpoq aappariit akissarsiat pillugit imminnut isumaqatigiissuteqarfigisinnaassasut. Taamatut akissarsiat pillugit isumaqatigiissuteqartoqarpat, aappaasoq, inuussutissarsiummik suliffeqarfimmut atatillugu isertitanik ilanngussisussaq, sulisitsisutut isigineqassaaq, akileraartarneq pillugu inatsiseqartitsinnermi nalinginnaasunik malittarisassat malillugit,

pisussaaffeqartuusoq. Aappaasumullu tamatumani pineqartumut aappaasoq akissarsiortutut isigineqassalluni. Taamatut isumaqatigiisummik isumaqatigiisuteqarsinnaanermut tunngaviumik piumasaqaataavoq aappariit tamarmik marluullutik suliffeqarfiup ingerlanneqarneranut peqataanissaat. Akissarsiat qaffasinnerpaaffigisassaannik aningaasanik annertussusiliineqanngilaq, akissarsiali aapparisaq suliffeqarfimmi sulineranut naapertuuttuussapput. Tamatuminnga naliliinermi aallaaviussapput aappaasup sulisitsisumi aapparisarinngisamini assingusumik suligaluaruni akissarsiarisinnaasaanut.

Suliffeqarfimmi "ingerlatsinermi pisortaq" sulisitsisutut isigineqaraangat, tamatuma nassatarisarpaq, akileraarutinik A-nik ilanngaassinissamut akilernissaannullu aammalu sulisoqarnermut akitsuutip akilernissaanut pisussaaffiit eqqortinneqarnissaannik piumasaqaateqarneq.

Aappariit aningaasaqarnikkut peqatigiinnerminnik akileraartarnermi atornerluiniarsinnaanerannut illersuutitut aalajangerneqarpoq, akileraartarnermi nalikilliliinerit pigisallu, katissimasut arlaannit ingerlanneqartumik inuussutissarsiutigalugu suliffeqarfimmi atorneqartut, pineqartumut atatinneqassapput, pigisaq taassuminnga imaluunniit inooqatigalugu aapparisaanit pigineqarnersoq apeqqutaatinnagu. Pigisanik akilersillugit akilersinnagilluunniit nuussinerit, nuussisumut nalinginnaasumik iluanaarutit akileraartarnermi kingunerisartagaannik nassataqanngillat, pissarsisuusoq nuus-sisup akileraartarnermi inissisimaneramik ingerlatitseqqittuummat.

Aappariit marluullutik suliffeqarfimmik ingerlatsinerat assigiisumik inissisimappat aamma aappariit suliffeqarfiup pisussaaffiit assigiimmik akisussaassuseqarpara, taava qinnuteqaateqarnikkut suliffeqarfiup ingerlanneqarnerani angusaasup akunnerminni avinneqarnissaat piumasarisinnaavaat, avitsineq inuussutissarsiummik suliffeqarfiup ingerlanneqarnerani tunngavissaqartinneqarnera tunngavigalugu.

Aappariit akileraarutaannik naatsorsuineri ataatsimut akileraarusigassaasut arlaqartut ingerlatiinnarneqarput, siunnersuutigineqarmat, aappariit arlaanni amigartoorutit sapinngisaq tamaat amigartooruteqartumut aappaasup isertitaanit ilanngaataassasut, aappariit ukiup aningaasarsiorfiusup naanerani inooqatigiippata. Aammalu siunner-suutigineqarpoq, inummut ilanngaat aappariit arlaanni atorneqanngitsoq, atuinngitsup aapparisaata akileraarutaanut appaatissatut nuunneqartassasoq, aappariit ukiup ani-ngaasarsiorfiusup naanerani inooqatigiippata. Kiisalu aamma siunnersuutigineqarpoq aappariinni toqukkut qimagaasoq akileraarusigaanngitsunik marloriaammik annertus-suseqartumik isertitanik B-mik isertitaqarsinnaatinneqassasoq aammalu aalajangersi-masumik ilanngaammik marloriaammik ilanngaateqartinneqarluni, ukiumi aningaa-sarsiorfiusumi, aappaasup toqukkut qimaguffigisaani, aappariit pisimasup nalaani inooqatigiissimappata.

Aappariittut inooqatigiit ataatsimut akileraarusigaasarnerata atorunnaarsinneqarnerata kingunerisaanik aammattaq siunnersuutigineqarpoq, aappaasoq aapparisami isertitaanit akileraarutaanut akiliisussaatinneqassanngisoq, tartaasutulluunniit.

Kiisalu siunnersuutigineqarpoq, akileraartarnermi oqartussaasut toqukkullu qimaguttoqarnerani pigisanik qimatanik suliaqarnermi inaarutaasumik akileraarusiinermit piumasaqaateqarsinnaanerannut aningaasat killigitinneqartut 10.000 aammalu 2.000 koruuninut qaffanneqassasut.

## 2.2. Nuussinernik akeqartitsineq.

Oqariaaseq nuussinernik akeqartitsineq tassaavoq akinik aalajangersaaneq aamma selskabit suliffeqarfissuartut aaqqissuunneqartut iluini aningaasatigut kaavigiaartitsinerisa iluini aaqqissuussinerit sulluunniit selskabit akunnerminni aaqqissuussinnaasaannut attuumassuteqartut pineqarput, taakkua nunani assigiinngitsuni angerlarsimaffeqaraangata isertitatigullu nunanut akileraarnikinneruffigisinnaasaminnut nuussiniarnermikkut siunertaqartunut.

Malittarisassani siunnersuutigineqartuni siunertaq tassaavoq, akileraartarnermi oqartussaasut akinik eqqortumik aalajangiisinnaanermut periarfissaqarnerisa annertusaaviginissaa tamatumuunalu suliffeqarfissuup iluani nunanut killeqarfiit apeqqutaatinnagit iliuuseqarnermi akileraarutaasussanik isertitanik eqqortumik naatsorsuinermut.

Siunnersuutigineqarpoq nammineerluni nalunaarusiornissamut aammalu suliffeqarfissuup iluani iliuutsini akinut piumasaqaatinullu uppersaasiornissamut toqqortaqarnissamullu pisussaaffiit annertusineqassasut.

Malittarisassat kinguneraat, akileraartussaataitasut soqutigisatigut nunani allani selskabinut atasuusut, inunnut il.il., nammineerluni nalunaarusiornermi niuernikkut imalunniit ingerlatseqatigiiffinni aningaasatigut iliuutsit (nakkutigisaasumik iliuutsit) suuneri annertussusaallu pillugit paasissutissanik tunniussinissaat. Naatsumik inernerusunik paasissutissat taamaallaat tamatumani pineqartuussapput. Nammineerluni nalunaarsuinermi immersugassami paasissutissat tamakkua allaffissaannik immikkut inissaqartitsineqassaaq.

Aammalu nakkutigisaasunik iliuuseqarnermi, akit piumasaqaatillu qanoq aalajangerneqarnerat pillugu uppersaasammik sananeqassaaq. Allaganngorlugu uppersaasiaq imatut iluseqassaaq, akit piumasaqaatillu, iliuutsit illuatungeriit attaviitsuusut akornanni pisimagaluarunik angusarineqarsimasinnaagaluartunut naapertuuttuunersut naliliiffigineqarnerannut tunngavissaasinnaassani. Nakkutigisaasumik iliuutsini minnerpaamik akit piumasaqaatillu qanorpiaq aalajangerneqarsimanerat suliffeqarfiit nassuiaateqarfigissavaat.

Malittarisassat annertunerusunik uppersaasarnissat suut pisariaqartuunersut aallaavittut akileraartussaataitasumut naliliiffigisassanngortippaat. Taamatut naliliinermit akileraartarnermi oqartussaasut akileraarusiinerminni OECD-p (Organisation for Economic Cooperation and Development) nuussinernik akeqartitsineq pillugu najoqqutassiai atussagaat eqqarsaatigineqartariaqarpoq. Akileraartarnermi oqartussaasut ilassutaasumik uppersaasiinissamik paasissutissanilluunniit piumasaqarsinnaapput, akileraartussaataitasup

uppernarsaasiinera, nakkutigisaasunik iliuutsinik naliliiniarnermut tunngavigissallugit naammangitsutut nalilerneqarpat.

Akilerartussaataitaasoq uppernarsaammik allaganngorlugu suliaqarsimangippat, akilerartussaataitaasup nakkutigisaasunik iliuutsinut atatillugu isertitai missiliuinikkut annertussusilerneqarsinnaaput.

Nuussinernik akeqartitsinerup ajornartorsiutaaneranut oqariaatsimut "armslengde"-imut attuumassuteqarpoq. "armslengde"-imut periutsit tassaapput periutsit suleqatigiissut soqutigisaqatigiissut akileraarteqaatissaminnik naatsorsuinerminni niuffatigisaminnut atatillugu assigiissunik akinik aamma piumasaaqatinik aalajangersaasimanissaat, taakkualu aalajangersarneqartut tassaassapput akinut aammalu piumasaaqatinut tunngatillugu soqutigisaqatigiunngitsumut allamut niuernerme ingerlatsinissaraluamut assingulluinnaqqissaartumik tunngaveqartinneqartussat. Taamaasilluni ingerlatseqatigiiffiit imminnut attuumassuteqanngitsut niueqatigiikkaangata il.il. periutsimut "armslengde"-mut naleqqutinngitsutut, taava iluanaarutaasut taamalu akileraaruserneqarnissaq nunamit allamiit nunamut allamut nuunneqartarluni.

### 2.3. Annikitsumik aningaasanguineq.

Siunnersuutigineqarpoq, selskabit pigisat nunami allamiusut ingerlatseqatigiiffiutigisaanni maaniittuni akiitsut namminerisanillu aningaasaatit imminnut naapertuutinnginnerisa kingunerisaannik (annikitsumik aningaasanguineq), Kalaallit Nunaanni akileraarutissanik, amerlavallaanik ernianik ilanngaateqalernikkut, Kalaallit Nunaanniit nunanut allanut nalinginnaq nuussinernut akornutaasussanik malittarisassanik aalajangersaaneqassasoq.

Selskabi pigisat pigineqartoq aningaasalerneqarsinnaavoq namminerisanik aningaasaatinik aningaasaliinikkut allanillu aningaasaliissutaasunik (akiitsut). Tamatuma saniatigut assigiinngitsutigut allanik periarfissaqarpoq, akuleriissitsilluni aningaasaliissutinik taaneqarsinnaasunik (hybride finansieringsformer). Aningaasaleeriaatsimik toqqaaneq aningaasaqarnikkut inatsisitigullu, tamatumani aamma akileraartarnermut tunngasutigut, isumaliutersuuterpassuarnik tunngaveqartarpoq.

Selskabi annikitsumik aningaasaliiffigisaaguni imaluunniit annikippallaamik aningaasaliiffigisaaguni, tamatuma nunat tamat akornanni akileraartarneq pillugu inatsiseqartitsinerme nassatarisarpaa, selskabip aningaasatigut pisariaqartitaasa, namminerisanik aningaasaatit amerlassusiannut naapertuutinngitsumik allanit aningaasaliiffigineqarneratigut, pissarsiarineqartarnerat.

Siunnersuummi malittarisassat erseqqinnerusumik aalajangersakkat malillugit siunertaavoq, selskabip annikitsumik aningaasaliivigineqarsimasup atukkanut ernianik nalitigullu annaasaqatinik ilanngaatiginnissinnaaneranik annikillilivigineqarnissaa. Taamaasilluni siunnersuutip nassataraa, selskabi (pigineqartoq) tamakkiisumik akileraartussaasoq, inummit inatsisitigulluunniit akisussaasuusumit (selskabi piginnittuusoq) nunami allamiumit aquunneqartoq,

nakkutigisaasumik atukkanut, t.i. selskabimut piginnittuusumut akiitsunut aammalu tamatumani suliffeqarfissuarmut atasuusunit imaluunniit inatsisitigut akisussaasusunit imaluunniit inunnit ataasiakkaanit qanigisanit atukkanut ernianut aningaasartuutit nalingigullu annaasaqaatinik ilanngaateqarsinnaanngitsoq, selskabip pigineqartup akiitsuisa namminerisanillu aningaasaataasa imminnut naleqqiunneranni annertussutsimit 2:1-imik sinniisumik, ukiup isertitsiviusup naanerani naatsorsuinermi, nikingappata. Siunnersuummi selskabinut kalaaliinnarnit pigineqartut pineqartunut ilaangillat, tamatumani akileraaruserinikkut atortut atortitsisullu tunngaviusumik illuatungeriisillugit pineqartussaammata. Suliffeqarfissup iluani akiitsunut erniat nalingigullu annaasaqaatit ilanngaataasinnaanersut, ukiuni aningaa-sarsiorfiusuni ataasiakkaani ukiup naanerani akiitsut namminerisanillu aningaasaatit sanilliunnerisigut aalajangerneqartarpoq. Ukiup aningaasarsiorfiusup naanerani naleq-qiussinermi annertussutsimit 2:1-imik annikinnerusumilluunniit nikingappata, nam-minerisanik aningaasaatit minnerpaamik 33 1/3 procentimik annertussuseqarlutik, akiitsunut erniat nalingigullu annaasaqaatit malittarisassat nalinginnaasut malillugit ta-makkiisumik ilanngaatigineqarsinnaapput. Taamaattoqarpallu atornermut pissutsit at-tuumassuteqartut piunasaqaatillu soqutiginaateqanngillat.

Ukiulli aningaasarsiorfiusup naanerani selskabip pigineqartuusup akiitsui namminerisanik aningaasaatit marloriaammik amerlaneruppata, namminerisamik aningaasaatit 33 1/3 procenti ataallugu annertussuseqarlutik, tamatuma aallaavittut kingunerissavaa suliffeqarfissuup iluani atukkanut ilanngaasinnaanerup atorunnaarsinneqarnera killiliivigineqarneraluunniit, kisiannili akiitsut sinnissutaasuinnarnut tunngatillugu. Taamaattumik Akiitsunut killissarititaasut 66 2/3-iusut iluanni akiitsunut ilanngaatiginnissinnaanermik atorunnaarsitsineq killiliinerluunniit atorunnaangisaannas-sapput. Akiitsunik namminerisanillu aningaasaatinik naleqqiussineq ukiut aningaasar-siorfiusut naaneri tamaasa, akiitsut namminerisanillu aningaasaatit naleqqiunneranni naleqqiussineq annertussutsip 2:1-iusup, ukiuni ataasiakkaani tamani, iluaniinnersoq naatsorsorneqartassaaq. Ilangaassiissuteqarsinnaaneq ukiuni naleqqiussinerup anner-tussutsimik 2:1-imik ataassisimaffigisaanni piusarpoq, naleqqiussinerilli 2:1-imit annertuneruffigisaanni ilanngaassiissuteqarsinnaaneq ilanngarneqassalluni.

Pisuni ataasiakkaani naleqqiussinermi killigititaq inatsiseqartitsinikkut aalajangerneqartoq (2:1) qaangerneqaraluartoq, selskabip ilanngaassiissuteqarsinnaanerup ilanngarneqarneratigut akileraartarnermi naqqiineq pinngitsoortissinnaavaa, selskabip qularnarunnaarsissinnaaguniuk, suliffeqarfissuup ilaatut atasut taamatut assingusumik aningaasalersorneqarsimassasut. Tassalu selskabip ersersitassaraa atukkiussat, nuna-mi allamiup piginnittuusup aalajangiisuusumik sunniuteqarneratiguinnaq piunasaqaatitaqartut, pineqannginnerat.

#### 2.4. CFC-mik akileraarusiineq.

Siunnersuutigineqarpoq illersuutissamik eqqussineqassasoq, tamannalu malillugu kalaallit selskabiutaasa pigineqartut sinneqartoorutit ingerlatseqatigiiffimmi nunami akileraarutikitsumi pigisami iluanaarutit pissarsiarineqartut ilannguttassallugit.

Malittarisassat suliffeqarfissuup Kalaallit Nunaanni nuunneqarsinnaasunik isertitatik nunanut appasinnerungaatsiartumik selskabinut akileraarusiisartunut, selskabinut akileraarutitik akileraaruserneqarnissamut tunngavissanik ilanngartuillutik, nuussisinnaaneranut illuatungiliuttuussapput. Malittarisassat taamaattut nunani allani arlaqartuni nassaassaapput. Malittarisassat tamakkuua nalinginnaasumik CFC-mik malittarisassatut taaneqartarput, t.i. nunani allani selskabinik aqutaasunik (Controlled Foreign Companies) akileraarusiineq pillugu malittarisassat.

CFC-mik malittarisassat aammattaaq inunnut ataasiakkaanut aammalu kalaallit selskabiinut nunami allami aalajangersimasumik ingerlatsivilinnut atorneqartassapput.

CFC-mik malittarisassat isertitat nuunneqarsinnaasut nunamut allamut akileraartarnikkut iluaqusiiniutigalugit inissinneqarsinnaasarnerat pinngitsoortinniassavaat. Taamaammatt CFC-mik isertitat tassaapput isertitat assigiinngitsut Kalaallit Nunaata avataanut ajornanngitsumik nuunneqarsinnaasutut isigineqartariaqartut. Ilaatigut tassaallutik erniat, pappiaqqanik nalilinnit nalitigut iluanaarutit, aktiatigut iluanaarutit, atuisinnaanermut akiliutit ilaat aammalu attartornernik aningaasaliiffiginnikkut isertitat.

Siunnersuutigineqarpoq kalaallit selskabiutaat piginnittuusut, aningaasaateqarfiit inuillu ataasiakkaat, CFC-mik selskabini nunani allani pigineqartuni isertitanik akileraaruserneqartassasut, iluanaarutit kalaallit malittarisassaat malillugit akileraarusigaanissaminnit annertuumik appasinnerusumi akileraaruserneqarpata, selskabip pigineqartup aningaasaliissutitigut pigisaat agguaqatigiissitsinermi selskabip pigisaanit tamanit 10 procenti sinnerlugu anertuususeqarpata.

Selskabi pigineqartoq nassuiarneqarpoq tassaasoq selskabi, kalaallit selskabiisa piginnittuusup toqqartumik toqqaannartuunngitsumilluunniit selskabip pigineqartup aktiatigut aningaasaataanik minnerpaamik 50 procentimik piginniffigisaa imaluunniit taasisinnaassuseqarnerit 50 procentii sinnerlugit atuisinnaaffigisaa.

Aningaasanik kalaallit selskabiutaata piginnittuusup isertitanik naatsorsuinermini ilanngutasaanik naatsorsuinermi, kalaallit akileraartarnermi malittarisassaat nalinginnaasut atorneqassapput. Selskabi piginnittuusup CFC-imik isertitanit taamaallaat akileraaruserneqassaaq. Selskabi pigineqartoq allanik isertitaqarpat, isertitat taakkua selskabimut piginnittuusup isertitaanut ilanngunneqassanngillat.

Piffissami selskabi piginnittuusup piffissami selskabimi pigineqartumi aalajangiisuuffigisaata imaluunniit annertuumik sunniuteqarfigisaata nalaani CFC-mik isertitat kisimik ilanngunneqassapput. Taamaattumik iluanaarutaasinnaasut, piffissaq aalajangiisuulerfiusoq imaluunniit annertuumik sunniuteqartuuffiulerfiusoq sioqqullugu, pissarsiaasimasut ilanngunneqassanngillat.

Selskabi piginnittuusup nunani allani akileraarutitik, selskabip pigineqartup CFC-imik isertitaminit akiligaanik, appaaffigineqassaaq.

## 2.5. Atuuttuulerfia.

Siunnersuutigineqarpoq nuussinermik akeqartitsineq, annikitsumik aningaasannguineq aamma CFC-mik akileraarusiineq pillugit maleruagassat 1. maj 2007 aallarnerfigalugu atuuttuulersinneqassasut. Matumani akileraarutitigut atornerluisinnaanermut maleruagassat illersuutitut eqqartorneqarmata, tulluartinneqarpoq siunnersuutigissallugu maleruagassat ullormi tusarniaassutigineqarneraniit atuuttussangortinneqassappata.

### 3. Aningaasat tungaasigut allaffissornikkullu pisortanut sunniutissai

Aappariinnik ataatsimut akileraarusiisarnerup atorunnaarsinneqarnerata nassatarissavaa aappariit tamarmik immikkut nammineerluni nalunaarusiamik ataasiinnarmik immersuinerumut taarsiullugu marlunnik immersuisalernissaat, tassalu aappariikkuutaartut tamarmik. Tamatuma nassataraa akileraaruseriviup nammineerluni nalunaarusiat 7.600-nik amerlanerusut akileraarusersortalissagai, tassalu nammineerluni nalunaarusiat amerlassutsimikkut 19 procentimik amerleriassallutik.

Taamaasilluni nammineerluni nalunaaruteqarfissat 7.600-t missiliorlugit qanganit amerlanerusut nassiussuunneqartalissallutik taamatullu amerlanerutigisut inaarutaasumik naatsorsuusiunneqartalerlutik.

Naatsorsuutigineqarmat Akileraartarnermut Pisorta qarfiup nammineerluni nalunaaru-tit naqeriikkat 2008-mi atortilissagai, tamanna nammineerluni nalunaarutit amerleri-arnerannut illuatungiliuttuusinnaassaaq.

Ataatsimut isiginnilluni, aappariinnik ataatsimut akileraarusiisarnerup atorunnaarsinneqarnera taamaasilluni nunap karsianut amerlanerusunik isertitsissutaananilu aningaasartuutaanerussanngilaq.

Akileraarutaasussanik isertitanik naatsorsuinerumi "armslengde princip"-imik taaneqartumik periutsip tamatumuunalu akileraaruserinikkut naqqiuteqarsinnaanerup inatsisitigut tunngavissinneqarnissaa siunnersuutigineqarpoq. Tamatumuunakkut akileraarutitigut isertitatigut annertussutsimik naliliiffigiuminaatsumik annaasaqarnissaaq pinngitsoortinneqassaaq.

Annikitsumik aningaasannguineq pillugu aammalu CFC-imik akileraarusiineq pillugu malittarisassat siunnersuutigineqartunut tunngatillugu, kalaallit selskabii siunnersuutini pineqartunut qanoq annertutigisumik ilaajumaarnissaat pillugu naliliinissamut ajornarunnaarsitsisunik paasissutissanik peqanngilaq. Naliliutigineqarporli tamanna annikitsuararsuussasoq, taamaasillunilu siunnersuutip isertitat amerlassusaanut sunniutissaa taamatuttaaq annikitsuararsuussalluni. Piffissaq ungasinnerusoq eqqarsaatigalugu siunnersuutit kalaallit akileraarutaannut tunngavigisanik ilanngartuinerumut illuatungiliuttuussapput tamatumuunalu siunertaanngitsumik isertitanik annaasaqarnissaaq pinngitsoortissallugu.

Siunnersuutit allaffissornikkut pisortanut annertunerusumik sunniuteqarnissaat ilimagineqanngilaq.



#### 4. Aningaasaqarnikkut allaffissornikkullu inuussutissarsiuteqartuusunut sunniutissai

Inatsisissatut siunnersuummi "armslengde princip"-imik taaneqartumik isummap tunngaviusup inatsisitigut aalajangersarneqarnera inuussutissarsiuteqartuusunut annertunerusumik aningaasatigut allaffissornikkulluunniit sunniutinik nassataqassanngilaq. Inatsisissatut siunnersuummi annikitsumik aningaasanngineq pillugu malittarisassat CFC-millu akileraarusiineq selskabinut ikittuararsuit, nalinginnaasumik suliffeqarfissuarnut atasuusut nunat allat akileraartarneq pillugu inatsiseqartitsinerisigut annikitsumik aningaasaliinermut CFC-millu akileraarusiinermut tunngasunik ilisimasaqareersut, taamaallaat annikitsuarsuarmik attussagai ilimagineqarpoq. Taamaammatt siunnersuutip allaffissornikkut suliffinnut nanertuutaanissaa annikitsuarsuussasoq ilimagineqarpoq.

#### 5. Avatangiisinut pinngortitamullu sunniutissai

Inatsisissatut siunnersuut avatangiisinut pinngortitamulluunniit sunniuteqartussaannngitsutut nalilerneqarpoq.

#### 6. Allaffissornikkut innuttaasunut sunniutissai

Aappariit tamarmik siunissami nammineerluni nalunaarutit marluk immersortalissavaat. Inatsisip allannguutaani aappariit 7.600 missigisaat pineqarput. Aappariit siunissami pisuussutitigut isertitat pisuussutitigullu aningaasartuutit aappaasumut eqqortumik pisussaasumut tutsinneqartarnissaat qulakkiigassarilerpaat. Pisuussutitigut isertitat imaluunniit pisuussutitigut aningaasartuutit aappariinni sorlermut tunngasuunerat aalajangiiffiqarsinnaanngikkaangat, aappariit tamarmik immikkut pineqartut affaat nalunaarusiornerminni ilannguttassavaat.

#### 7. Naalagaaffeqatigiinnermut namminersulivinnissamullu tunngatillugu

Siunnersuut naalagaaffeqatigiinnermut namminersulivinnermulluunniit toqqaannartumik attuumassuteqanngilaq.

#### 8. Pisortanit soqutigisaqatigiiffinnillu tusarniaaneq

Siunnersuut Namminersornerullutik Oqartussat pisortaarfii nut tamanut, KANUKOKA-mut, Kalaallit Nunaanni Sulisitsisut Peqatigiiffiannut (GA), ILIK-mut, Nunaqavissut Suliffiutillit Kattuffiannut (NUSUKA), Sulinermik inuussutissarsiuteqartut Kattuffiannut (SIK), Atorfillit Kattuffiat (AK), KNAPK, Savaatillit Peqatigiinnut, ASG-mut, Deloitte-mut aammalu Grønlands Revisionskontor aammalu Kalaallit Nunaanni naligiissitaanermut siunersuisoqatigiinnut tusarniassutigineqarsimavoq.

Tusarniaanermi akissutit siunnersuummi allannguutissanut tunngavissiisimanngillat.

Tusarniaanermi akissuteqaatit tiguneqartut Sulinermik inuussutissarsiuteqartut Kattuffiat (SIK), KANUKOKA-mut, ILIK, Deloitte, Grønlands Revisions kontor, Atorfillit Kattuffiat (AK), Nunaqavissut Suliffiutillit Kattuffiannut (NUSUKA),

Ataatsitassaqaqarnermut Pisortaqarfik, Ilaqutariinnermut Pisortaqarfik, Kulturimut ilinniagaqarnermut ilageeqarnermullu ilisimatusarnermullu Pisiortaqarfik, Ineqarnermut attaveqatigiinnermullu Pisortaqarfik, Inuussutissarsiornermut Pisortaqarfik, Peqqissutsumut Pisortaqarfimmit, tiguneqartut Akileraartarnermut aamma akitsuusiisarnermut ataatsimiititamut ingerlatinneqarsimapput.

## **Inatsisissatut siunnersuummi aalajangersakkanut ataasiakkaanut nassuiaatit**

### *§ 1-imut*

Nr. 1-imut

Imm. 1-imi siunnersuutigineqarpoq aappariit isertitat akileraarusigaasussat tamarmik immikkut naatsorsortassagaat. Taamaasillutik aappariit tamarmik immikkut nammineerluni nalunaarsuiffissamik inaarutaasumillu naatsorsuummik tigusaqartassapput.

Imm. 2-mut

Aappariit nammineq akileraarusigaasussanik isertitamik tamarmik immikkut kisimiittunut malittarisassat atuuttuusut malillugit naatsorsussavaat, inatsiseqartitsinermi allamik malitassaqaqqippat.

Aappariit akileraartarnermut tunngatillugu inooqatigiittut isigineqassanersut § 4, imm. 3-miit 6-imut isumasiornerisigut aalajangerneqassaaq. Aalajangersakkat taakkua apeqqut inooqatigiikkunnaarnerup akileraartarnermut tunngatillugu qaqugukkut pisarneranik allaaserinnillutik killiliippat, tassani allaaserineqarmat akileraartarnermut tunngatillugu qaqugukkut inooqatigiinneq atorunnaartutut isigineqassanersoq.

Imm. 3-mut

Averusernermi avinnermiluunniit inooqatigiinneq akileraartarnermut tunngatillugu atorunnaartutut isigineqassaaq averusernerup avinnerulluunniit pineraniit, t.i. ullormi averuserfimmi imaluunniit eqqartuussinerup inaarneqarneranit allakkatigut nalunaarutigineqarneraniit. Aajangiineq eqqartuussinertigut pippat taava kredsretsimi ulloq eqqartuussiviusoq aalajangiisuussaaq, aalajangiineq isumaqatiginagu ingerlatiseqqiineqanngippat aamma Kalaallit Nunaata eqqartuussiviani averusernermik imaluunniit avinnermik akuersissuteqartoqanngippat. Tamatuma nassattaraa, aappariit akileraartarnermut tunngatillugu ukioq isertitaqarfiusoq tamaat inooqatigiissimanngitsutut isigineqarnerat, taamaammallu aappariit ukiumi isertitsiviusumi pineqartumi kingumoortumik sunniuteqartumik katissimanngitsutut akileraaruserneqassallutik ukiup isertitaqarfiusup aallaqqaataaniit.

Imm. 4-mut

Inooqatigiinneq averusernertaqanngitsumik avinnertaqanngitsumilluunniit atorunnaarsinneqarpat, inooqatigiinneq akileraartarnermut tunngatillugu ukiup isertitaqarfiusup inooqatigiikkunnaarnerup piffigisaata naanerani pisutut isigineqassaaq. Taamaasilluni aappariit akileraartarnermut tunngatillugu ukiumi inooqatigiikkunnaarfiusumi ukioq tamaat inooqatigiissimasutut isigineqassapput.

Inooqatigiinneq avissaarnikkut atorunnaartutut isigineqassanersoq, pisut ataasiakkaat naliliiffigineqarneranni apeqqutaassaaq, aallaavittulli inooqatigiinneq aappariit akornanni isumaqatigiinnginnerup kingunerisaanik atorunnaarsinneqarsimassaaq. Taamaattumik aallaavittut inooqatigiinneq atorunnaartutut isigineqassanngilaq aappariit inuussutissarsiuteqarnertik pissutigalugu avissaaqqappata, avissaaqqaneq amerlanertigut avissaaqqagallarnerinnartut pisarmat. Tamannattaaq aamma atuuppoq aappariit arlaat sivisuumik eqqartuussanut inissiisarfimmiititaanermik pillagaasimappat.

Aappaasoq utoqqaat angerlarsimaffianniippat, inooqatigiinneq akileraartarnermut tunngatillugu atorunnaartutut isigineqassaaq, utoqqaat angerlarsimaffiat aappariit siusinnerusukkut najugarisarisimasaannut ungasinngitsumiikkaluarpalluunniit. Aappariit tamarmik marluullutik utoqqaat angerlarsimaffianni ataatsimi najugaqarpata, akileraartarnermut tunngatillugu inooqatigiittutut isigineqassapput, tamarmik immikkut ineqaraluarpataluunniit.

Imm. 5-imut

Averusernerup inooqatigiinnerulluunniit atorunnaarsimanerata kingornatigut inooqatigiinneq ingerlateqqilerneqarpat, inooqatigiinneq akileraartarnermut tunngatillugu inooqatigeeqqilernerup aallartiffianiit atuuteqqilersutut isigineqassaaq.

Imm. 6-imut

Aappariit arlaata akileraartussaataitanera nunamut allamut nuunneq pissutigalugu atorunnaarpat, inooqatigiinneq akileraartarnermut tunngatillugu akileraartussaataitanerup atorunnaarneraniit atorunnaartutut isigineqassaaq.

Nr. 2-mut

§ 4a-mut

Imm. 1-imut

Siunnersuutigineqarpoq inuussutissarsiummik suliffeqarfimmik ingerlatsineranut atatillugu isertitat, aappaasumi inuussutissarsiummik suliffeqarfimmik ingerlatsisuusumi tamatigut akileraaruserneqartassasut.

Taamaammat pigisat inuussutissarsiummik ingerlataq imaluunniit pigisat ingerlatsinermi atorpeqartut aappaasup arlaata pigisaanut atasuunersut imaluunniit immikkut pigisarinerai apeqqutaatinneqassanngilaq.

Aappariit arlaannaalluunniit inuussutissarsiummik suliffeqarfiup ingerlanneqarnerani peqataanngippat, assersuutigalugu kommanditistinut piginneqataaneq imaluunniit neriniartarfiutigisamik attartortitsineq pineqarpat, inuussutissarsiummik ingerlatsivik taanna aqutigalugu isertitat aappaasumi aapparinneq pillugu inatsiseqartitsinermi malittarisassat malillugit inuussutissarsiutigalugu suliffeqarfimmik oqartussaaffiginnittumi akileraaruserneqassapput, tak. § 4b.

Aappariit tamarmik inuussutissarsiummik ingerlatsiviup ingerlanneqarnerani peqataappata, aapparisaq inuussutissarsiummik ingerlatsivimmik annertunerpaamik ingerlatsisuusoq, inuussutissarsiummik ingerlatsivik taanna aqutigalugu isertitanik akileraaruserneqassaaq. Tamatuminnga aalajangiinermi eqqarsaatigineqassaaq, aappariinni kina sulinermigut aamma iliniagaqarsimasinnaanermigut, ingerlatsiviup ingerlanneqarneranik isumaginnittuunersaq.

Imm. 2-mut

Aappariit akissarsiaqarneq pillugu akunnerminni isumaqatigiissuteqarsinnaapput, aappaasup suleqataasup piukkunnaatiminut sulinerminullu naapertuuttumik akissarsiaqartinneqarnissaanik qulakkeerisuusumik.

Akissarsianik annertussusiliinermi aappariit nalinginnaasumik suliffeqarnermi pissutsit atugassaritinneqartullu atuuttuusut aallaavigisinnaavaat.

Aappariit tamatumunnga atatillugu tunngavigisassat makkua aallaavigisinnaavaat:

- 1) Suliaqarfimmut isumaqatigiissutit naapertorlugit akissarsiaat
- 2) Aappariit siusinnerusukkut suliffimmi allami assingusumik suliaqarnermini akissarsiaqartitaasimanerat.
- 3) Suliaqarfimmut pineqartut nalinginnaasumik suliffissaqarnikkut periarfissarisaat. Assersuutigalugu sulisut pineqartut nalinginnaasumik amigaataappata, qaffasinnerusumik akissarsiaqarneq aamma aapparisaq suliffeqarfiutaani akuerineqarsinnaavoq.
- 4) Inuussutissarsiutigalugu suliffeqarfimmi sulisunik allanik akissarsiaqartitsineq.

Akissarsianik isumaqatigiissuteqarnermi aappaasoq annertunerpaamik inuussutissarsiutigalugu suliffeqarfimmik ingerlatsisuusoq sulisitsisutut, aningaasarsianit akileraarutit pillugit inatsisartut inatsisaat aamma akileraaruserinermik ingerlatsineq pillugu inatsisartut inatsisaanni pisussaaffeqarneq malillugu inissisimavoq. T.i. sulisitsisutut unerartitsisussaanermik pisussaaffeqarneq aammalu ukiut tamarluinnaasa piumaffigineqaaqqaarani akissarsiaritissimasanit aammalu akileraarutinik unerartitsisimanermik, ajunngitsorsianik, iluanaarutisianik

il.il. aamma akissarsiortup kinaassusaanik paasissutissanik Akileraaruseriffimmut takussutissiisarnernik. Akissarsianik isumaqatigiissut akileraaruserinikkut sunniuteqartinneqarsinnaavoq taamaallaat, aapparisaq sulisitsisutut inissisimasoq A-mik akileraarutinik ilanngaassisarlu akiliisarpas sulisoqarnermullu akitsuut ilanngullugu akilertarlugu. Aapparisaq sulisartutut inissisimasup aappaanit unerartitsinngitsoornerit imaluunniit akiliuteqanngitsoornerit pisimassappata ilisimasimassanngippagu apeqqutaassanngilaq.

§ 101 malillugu akissarsianik ilanngaassinermut atatillugu aningaasat akissarsianit ilanngaataasut, aappaasup akissarsiaqartuusup pisassarisaanik pisassaqaalersitsisinnani, akilerneqaqqaarsimassapput.

Aappaasooq sulisitsisutut inissisimasooq aapparisaq akissarsiaanut paasissutissanik ukiup naanerani nassitsisussaavoq.

Imm. 3-mut

Aalajangersakkami siunertarineqartoq tassaavoq, inuussutissarsiutigalugu suliffeqarfiup aappariit ataatsimoorlutik ingerlatarisaata angusarisaasa, inuussutissarsiummik peqatigiilluni, soqutigisatigut ataatsimoorussiviunngitsumik peqataaffigineqarluni, ingerlanneqartutut, akileraartarnikkut sapinngisaq tamaat pineqarnissaannik aappariit toqqaasinnaanerat ajornarunnaarsinniarneqarmat.

Nammineq avitseqatigiissinnaanermik atuisinnaanermut piunasaqaataavoq aappariit tamarmik inuussutissarsiutigalugu ingerlatap ingerlanneqarneranut marluullutik peqataasuunissaat. Aappariit tamarmik inuussutissarsiutigalugu suliffeqarfimmi peqataannippata, sinneqartoorutit amigaartoorutilluunniit aappaasumi inuussutissarsiutigalugu suliffeqarfimmik oqartussaaffiginnittumi akileraaruserinermi inissinneqassapput.

Aammattaaq piunasaqaataavoq aappariit tamarmik assigiimmik inuussutissarsiutigalugu suliffeqarfiup ingerlassap pisussaaffiitut assigiimmik akisussaassuseqartuussasut. Tamatumuuna aappariit tamarmik inuussutissarsiutigalugu suliffeqarfimmut tunngatillugu aningaasatigut akiliisuusinnaapput, aappariit akornanni piginnittoqatigiinnerannik erseqqissaataasumik. Taamatuttaaq tamanna aamma inuit marluk ingerlatamik inuussutissarsiutigalugu suliffeqarfimmik ingerlatseqatigiinneranni atuuppoq. Assersuutigalugu soqutigisaqatigiilluni inuussutissarsiutigalugu suliffeqarfimmik ingerlatami soqutigisaqatigiit (piginneqatigiissut), pisarneq tamatumunngalu tunngasunik atuarneqarsinnaasut malillugit, inuussutissarsiutigalugu suliffeqarfiup ingerlatap pisussaaffiitut assigiimmik toqqaannartumillu inuttut pisussaaffeqarput – akiliisussaasuupput.

Aappariit matumani pineqartutut inuussutissarsiutigalugu ingerlatamik ataatsimut ingerlatsisuuppata, tamatuma kingunerissavaa – ataatsimut soqutigisaqatigiinngikkaluartunit inuussutissarsiutigalugu ingerlatamik ingerlatseqatigiittoqartillugu pisartutut, soqutigisaqatigiinneq pillugu

assigisaanilluunniit isumaqatigiissusiortoqartarnerata tamatigut pisannginnera, inuussutissarsiutigalugulu suliffeqarfik ataatsimoorluni pigineqartariaqarani.

Aappariit ataatsimoorlutik erseqqissumik akunnerminni isumaqatigiissuteqanngikkaluarlutik aammalu ataatsimoortumik piginnittuunngikkaluarlutik inuussutissarsiutigalugu suliffeqarfimmik ingerlatsinissamik kissaateqartut aalajangersakkamik atuisinnaanermut periarfissaqartinneqarnissaasa mattunneqannginnissaa siunertaralugu, suleqatigiinnerup soqutigisaqaqatigiinneq pillugu isumaqatigiissummik assigisaanilluunniit peqarnissamik imaluunniit aappariit tamarmik inuussutissarsiutigalugu ingerlatamik piginnittuunissaannik piumasaqaateqanngilaq.

Akerlianilli – angusarisaasumik naligiittut avitsisinnaassagunik – soqutigisaqaqatigiiffimmi assigisaanilluunniit ataatsimut peqataanerup saniatigut naligiimmik peqataasutut akisussaaffiginnittuussapput. Tamatuma kinguneraa, aappariinni aappaasup kisimi inuussutissarsiutigalugu ingerlataq pigisarippagu aalajangersakkap atornerqarsinnaannginnera, aappaasooq inuussutissarsiutigalugu suliffeqarfiup pisussaaffiunut aapparmisut annertussuseqartumik akisussaassuseqartuunngippat, assersuutigalugu akiliisussaasutut inissisimaqataanikkut.

Iliuutsit taamatut itsillugit pilersuisuusunut il.il. pisuni tamani aappariinnut tamarmik assigiimmik akiliisussaassuseqarnerminnik oqaatiginnittarnissaat ajornakusoortussaammat, piumasaqaatip naammassinissaanut naammassaaq inuussutissarsiutigalugu suliffeqarfiup tigorianaasunik aningaaserivimmit atukkanut aningaaserivimmiillu il.il. allatigut atukkanut pilersuisuusunullu pingaarnernut assigiimmik akiliisussaasuunermik pigisaqartuunissaat.

Inuussutissarsiutigalugu ingerlatap pisortanut akiitsui pilersuisunut pingaarnernut akiitsunut naligititaapput, taamaasilluni aalajangersakkap atornissaanut piumasaqaataalluni, aappariit tamarmik inuussutissarsiutigalugu ingerlatamut tunngatillugu akileraarutininik A-nik unerartitanut sulisoqarnermullu akitsuummik akiliinissamat akisussaasuunissaat. Aappariit aningaasanut tamakkununnga assigiimmik akiliisussaataariinngitsut, akiliisussaananermut piumasaqaat naammassinnaavaat akileraaruseriffimmut marluullutik inuussutissarsiutigalugu suliffeqarfimmut tunngatillugu akileraarutininik A-nik sulisoqarnermullu akitsuummik akiliisussaananerminnik nalunaarummik allagaqarnermikkut.

Nalunaarut aappariinnit tamanit atsiugaasusaaq siusinnerusukkut GER-mik (Kalaallit Nunaanni namminersorluni inuussutissarsiuteqartut nalunaarsorsimaffiat) nalunaarsugaanermut uppersarsaatip assilineranik ilaqartinneqassaaq, Inuussutissarsiuummik ingerlataqartunik nalunaarsuiffik pillugu Inatsisartut inatsisaat naapertorlugu.

Akiliisussaananerup allanngugaasup nalunaarsugaaneranut uppersarsaataasumik nalunaarsugaanermut uppersarsaammik sananeqassaaq GER-normu atorrigaqq atorlugu, § 4a, imm. 3 malillugu akiliisussaaneqarneranik ilassutaasumik paasisutissiissummik imaqartillugu. Aappariit akiliisussaananermut pisussaaneq

atorunnaarsinniarunikku, tamanna taamatuttaaqaq akileraaruseriffimmut nalunaarutigineqassaaq. Tamatumani nutaamik nalunaarsugaanermut uppersaasiorneqassaaq GER-normu atoriigaq atuinnarlugu, ilassutaasumilli paasissutissiissutit piarlugit.

Nammineq avitsisinaanermut malittarisassaaq, aappariit ukioq isertitaqarfiusoq tamaat inuussutissarsiutigalugu ingerlatap pisussaaffiinut annertoqatigiimmik akiliisussaappata, aatsaat atorineqarsinnaavoq. Taamaammatt naammangilaq nammineerluni nalunaarummik sananerup nalaani kingusinnerusukkulluunniit aappariit malittarisassamik imm. 4 naapertorlugu atuinissaminnik qinnuigineqarnerisa nalaani annertoqatigiimmik akiliisussaataasuppata. Ukiumili inuussutissarsiutigalugu ingerlatap pilersinneqarfiani atorunnaarfianiluunniit, piffissami ingerlatap ingerlanneqarfigisaani taamaallaat akiliisussaaneq atuutissaaq.

Akiliisussaaqatigiinnermik malittarisassaaq ukiup isertitaqarfiusup aallartinnerani naammassineqarsimassaaq. Taamaammatt naammangilaq aappariit ukiup isertitaqarfiusup aallartinnerata kingornatigut inuussutissarsiutigalugu suliffeqarfiup ingerlatap ukiup isertitaqarfiusup aallaqqaataaniit pisussaaffiinut kingumoorumik assigiimmik akiliisussaassuseqalernissaat. Inuussutissarsiutigalugu suliffeqarfiup ataatsimut ingerlanneqartup pisussaaffii taamaallaat aappariit assigiimmik akiliisussaaffigisaraat. Aappariinni aappaasoq inuussutissarsiutigalugu suliffimmik allamik saniatigut ingerlataqarpata – assersuutigalugu illumik attartortittakkamik – aappariit ingerlatamut tassunga atatillugu assigiimmik akiliisussaanaissaat piunasaqaataangilaq, illu pineqartoq inuussutissarsiutigalugu suliffimmut ataatsimoorluni ingerlanneqartumut attartortinneqarsimagaluarpalluunniit. Attartortitsinermilli ingerlataq inuussutissarsiutigalugu suliffeqarfimmut ataatsimut ingerlatamut ilaasuppata, aappariit aamma illuutigisamut atatillugu annertoqatigiimmik akiliisussaataasapput.

Imm. 4-mut

Aappariit toqqaanertik allanngortissinnaavaat, tamanna aappariit marluullutik qinnuteqaateqarnikkut akileraaruseriffimmut ukiup isertitaqarfiusup naannginnerani tamanna nalunaarutigunikkut.

§ 4 b-mut

Aappariit isertitaannik naatsorsuinermini pigisanik akiitsunillu taakkunungalu atatillugu isertitat aningaasartuutillu, agguanneqarnerat soqutiginaateqarnerpaajupput.

Aalajangersakkap nassataraa, aappaasoq aappariinneq pillugu inatsiseqartitsineq malillugu pisuusummik piginnittuusoq imaluunniit – pisuussutinut ilanngaatigineqarsinnaatitaasunut atatillugu aningaasartuuteqarnermut tunngatillugu akiliisuusussaaq – akileraarusigaasussanik isertitaminik naatsorsuinermini isertitanik aningaasartuutinillu taakkunungala atasunik ilanngussisuusaaq.

Aappaasoq aappariinneq pillugu inatsiseqartitsineq malillugu pigisanut piginneqataassutsimik immikkulluunniit pigisanik pigisaqartuuvoq, tassaasoq:

1) piffissami aappariilernermi pigisaraisai,

2) aappariinnermi kingornussarsiatut, tunissutitut imaluunniit inuuniarnerminut atugassatut pissarsisimasoq, imaluunniit

3) aappariinnerup nalaani isertitaqarsimasoq isertitaminilluunniit atuilluni pissarsisimasoq.

4) tamatumunngaluunniit atatillugu taarsiutaasunut.

Aappaasoq pigisanut piginneqataanerminut immikkulluunniit pigisarisinnaasaminut – immikkut pigisap suunera apeqqutaatinnagu – akisussaasuvoq, pineqartup pisussaaffiitut, tamakkua aappariilernerup siornatigut nalaaniluunniit pinngorsimanerat apeqqutaatinnagu.

Taamasilluni aappariinni sorleq piunasaqaammut aalajangersimasumut akiliisussaataitanersoq, aappariinni sorleq akiligassaqaqarfigisamut isumaqatigiissuteqarnikkut, imaluunniit akisussaassuseqarnermik nassataqartumik pissutsit pissutigalugit, akisussaassuseqarnersoq apeqqutaavoq.

Aappariit nammineerlutik nalunaarutaanni pigisat akiitsullu agguanneqarnerat akileraartarnermuinnaq pingaaruteqanngilaq, aammali innuttaasut akornanni pissutsit pillugit inatsiseqartitsinermi piginnittuuneramik aalajangiiniarnermi, assersuutigalugu akiligassaqaqarfigineqartunut pigisanilla avitsinerusinnaasunut tunngatillugu.

Tamannali isumaqanngilaq akileraartarnermi oqartussaasut aappariit avitsinerannik misissuisinnaanngitsut, aappariit ukiumiit ukiumut pigisanik akiitsunilla, tamakkununngalu atasunik isertitanik aningaasartuutinilla annertuumik allangortiteriuarneranni. Taamatut pisoqartillugu amerlanertigut oqartussaasut aningaasaatigut isertitat aappaasumit arlaannit nammineerluni nalunaarutigineqartarnissaat, ilanngaataasinnaasutullu aningaasaliinertigut aningaasartuutit aappariinni tamani ilanngunneqannginnissaat qulakkiissallugu pisariaqartassaaq.

Aammali aappariit pisuussutitigut isertitanik annertuumik allaanerusumik avitsisillugit, taamatullu avitsineq akileraartarnermi pingaaruteqartillugu, akileraartarnermi oqartussaasut nammineerluni nalunaarummi avitsineramik allannguinissamut pisinnaatitaassapput, tamanna § 4b-mut naapertuuttunngorlugu.

Pigisaq aappariinni sorliup piginneqataassutaanut imaluunniit immikkut pigisarisanut ilanngunneqassanersoq naliliineq pissutsinik immikkut toqqaannartumik naliliinermik tunngaveqassaaq, makkua naliliinermi ilanngunneqassallutik:

1) Pigisamik kina piginnittuittut inissisimava?



2) Illunut, biilimut angallatinullu tunngatillugu apeqqutaavoq, kina piginnittutut nalunaarsugaanersoq.

3) Pigisat allat eqqarsaatigalugit kina piginnittuiunersoq assersuutigalugu pisinermut allagartami takuneqarsinnaasassaaq.

4) Pigisap pissarsiarinera kiap aningaasaliiffigineratigut akilersimavaa?

Piginnittuiunermut uppernarsaatissaqanngippat, imaluunniit piginnittuunermut, aappaasup pineqartup pisariaqartumik akissaqarsimannginneranik peqquteqartumik akerliusumik ilimanartoqarpat, akileraartarnermi oqartussaasut, pissarsiarineqarnerata qanoq aningaasaliiffigineratigut akilernerqarsimaneranik misissuisariaqassapput. Assersuutigalugu imaassinnaavoq pigisaq kingornussarsianik atuuttuusumilluunniit tunissutinik akilernerqarsimasoq.

Aappariit pigisanik akiitsunillu avitsinerannik misissuinermi akileraartarnermi oqartussaasut sianigissavaat, aappariit aappariinneq pillugu inatsiseqartitsinermi malittarisassat malillugit inatsiseqartitsinermi imminnut pituttuisuusumik iliuuseqarfigisinnaasuunerat.

Taamaasilluni aappariit atukkiussanut tunngatillugu imminnut isumaqateqarfigisinnaanerannut, atukkiussallu taakkua erniaqartinneqarsinnaanerannut akornutissaqanngilaq.

Isumaqatigiisummik taamaattumik akileraartarnermi oqartussaasut qaangiinnaasinnaanersut, isumaqatigiisummik imarisaanillu toqqartumik naliliinermik tunngaveqartariaqarpoq. Akileraarusigaasussanik isertitat aappariinni sorlermut atasuunersut aalajangerneqarsinnaanngippat, aappariit isertitat avissavaat, oqaaseqatigiit aappaat takuuk. Malittarisassaq tamanna aappariit pigisaq pineqartoq kimit pigineqarnersoq, imaluunniit akiitsoq pineqartoq kimut tunngasuunersoq nalornippassuk aamma atuutsinneqassaaq.

Aappariit akileraarutaasussanik isertitaat aallaaviusumik akileraartussaataasunut kisimiittunut malittarisassat atuuttuusut assigisaannik malittarisassat malillugit naatsorsorneqassapput.

Nr. 4 c-mut

Imm. 1-mut

Aappaasoq § 4a naapertorlugu isertitanik pissarsisussaasutut taasap, aningaasarsiat akileraaruteqaataasussat naatsorsornerini inuussutissarsiutigalugu suliffeqarfimmik ingerlassaminis isertitani ilanngutissavai. Tamannalu peqqutigalugu aammattaaq aappaasoq taanna akileraarutitigut nalikilliliissuteqarsinnaatitaassaaq.

Imm. 2-mut

Aappaasup pigisamik inuussutissarsiornermi atorneqartumik, aapparisami inuussutissarsiummik suliffeqarfimmi ingerlataani inuussutissarsiornermi atugassatut pigisanik nuussinerani, aappaasup pigisamik tunniussisuusup, iluanaarutaasinnaasut annaasaqaataasinnaasulluunniit akileraarutaasussanik nammineq isertitaminik naatsorsuinermini ilanngutissanngilai.

Akerlianilli aapparisap pigisamik nuussivigineqartup tunineqartulluunniit, aapparisami akileraartarnermut tunngatillugu inissisimaneramik ingerlatsiteqqiisuvoq. Taamaattumik aappariitt arlaataluunniit tunniussinermi aningaasartuutaasinnaasut ilanngaatisinnaanngilai.

Imm. 3-mut

Aappariilli nioqqutissanik inuussutissarsiutitut suliffeqarffimmit pinngortunik imminnut tunniussinerat pippat, illuatungeriit attaviitsuusut akornanni nalinginnaasumik pisinertut tuniniaanertullu assigitillugu isigineqassaaq.

Imm. 4-mut

Ingerlatsinermi atortuutinik imaluunniit umiarsuarnik tunniussinermi nuussinermiluunniit atuineq allanngortinneqarpat, nuussineq tamanna pigisamik pineqartumik tunisineranut nalogitineqassaaq. Taamatuttaaq atuutissaaq inuussutissarsiornermut imaluunniit ilaannakuusumik inuussutissarsiornermi pigisanik atuinernik allanngortitsinerni.

Tunisinertut aki imaluunniit pissarsiarinera naliusoq tassaassaaq pigisap atorneqarneranit allanngortinneqarnerata nalaani niuerutigineqarnerani nalit. Ilaatigut innersuussutigineqassaaq Namminersornerullutik Oqartussat akileraarutitigut nalikilliliinerit il.il. pillugit nalunaarutaat nr. 30, 1. december 2006-imeersoq.

§ 4 d-mut

Imm. 1-mut

Aappariit akileraarutissaat aallaaviusumik immikkut naatsorsuiffigineqassapput, taakkua aningaasarsiat akileraaruteqaataasussat tunngavigalugit naatsorsorneqarsimassallutik.

Imm. 2-mut

Siunnersuutigineqarpoq, aappaasup akileraaruteqaataasussanik isertitai amigartoorutaappata, aappariillu ukiup isertitaqarfiusup naanerani inooqatigiippata, amigartoorutit taakkua sapinngisaq tamaat aapparisaata akileraaruteqaataasussanik isertitaanit ilanngaatigineqassasut. Ilanngaaneq pissaaq, aapparisaasup ukiut siuliini nammineq amigaartoorutaasa atorneqanngitsut ilanngaatigereerneranni. Taamatut ilanngaateqareernermi amigartoorutit suli atorneqanngitsut sinneqarpata, taakkua §

30, imm. 1-mi malittarisassat malillugit ukiunut tulliuuttunut ilanngaattissanngorlugit naatsorsorneqassapput.

Amigaartoorutit aappariit akornanni nuunneqarneranni, aappariit akileraarusigaasussanik isertitaannik naatsorsuinermini, isertitat nunami allami nunamilu maaniunngitsoq akileraarusigaasut, imm. 2, oqaaseqatigiit siulliit tullii naapertorlugit, ilanngunneqassanngillat. Aalajangersagarli isertitanut, isertitanit akileraarutit § 69 naapertorlugu ilanngaaserneqarnerisigut appagaappata, atuutinngilaq.

§ 4 e-mut

Katissimalluni aapparissaminik ukiup isertitaqarfiusup naanerani inooqateqartoq, inummut ilanngaammik ilanngaattissani tamakkiisumik atorsinnaanngippagu, inummut ilanngaatip atorneqanngitsortaa aapparisaasumut nuunneqarsinnaavoq.

Tamatuma kingornatigut inummut ilanngaat atorneqanngitsoq taassumaluunniit ilaa ukiumi isertitaqarfiusumi tulliuuttumi atorneqartussanngorlugu nuunneqarsinnaanngilaq.

Nr. 3-mut

Aappariit inooqatigiittut ataatsimut akileraaruserneqartarnerata atorunnaarnissaanik siunnersuutip kingunerisaanik siunnersuutigineqarpoq, ukioq isertitaqarfiusoq toqukkut qimaguffiusoq tamaat akileraartussaataaneq aappariinni toqukkut qimagaasumut tamakkiisumik nuunneqarnissaanik malittarisassaq atorunnaarsinneqassasoq.

Atorunnaarsitsinerup kinguneraa, aappariinni toqukkut qimagaasoq aamma ukiumi isertitsiviusumi, aapparissap toqukkut qimaguffigisaani, nammineq isertitaminit taamaallaat akileraaruserneqassasoq, toqukkut qimagaasoq pigisanik qimatanik kingornussiassanik agguassinertaqanngitsumik pigiinnaraluarpagilluunnit.

Aappaasup toqukkut qimagaasup toqukkut qimaguttup akileraartarnermi inissisimaneranut taartaanissaanik malittarisassaq allanngortinnagu atuutitiinneqassaaq. Aappaasoq toqukkut qimagaasoq taamaasilluni toqukkut qimaguttup akileraartarnermi inissisimaneranut ingerlatsinnassaaq, aamma pigisanik nalilinnik ilanngaasiissutigineqarsinnaasunik tigusilluniittaaq, aamma akileraarutitigut nalikilliliissutigisimasinnaasat toqukkut qimagaasumit naatsorsuunneqartutut isigineqassapput.

Aappaasup toqukkut qimaguttup inuussutissarsiornerminut imaluunniit iluanaarniarnermut atatitillugu pigisanik nalilinnik pissarsisimappat, taava aappaasup toqukkut qimagaasup aningaasarsiamini akileraaruteqaataasussani naatsorsuinermini tunisinermini iluanaarutit imaluunniit amigartoorutit (ajunaarutit) ilanngutissavai, toqukkut qimaguttup pigisat nalillit tunisimasuugaluarpagit

aningaasarsiamini akileraaruteqaataasussani naatsorsuinermini iluanaarutitut amigartoortutitulluunniit naatsorsuissanerata assigisaanik inerneqartumik.

Nr. 4-mut

Aappariinnik inooqatigiittunik ataatsimut akileraaruserneqartarnerisa atorunnaarnissaanik siunnersuutip kingunerisaanik siunnersuutigineqarpoq, toqukkut qimaguttup ukiumi isertitsiviusumi toqukkut qimaguffiusumi akileraarutai, toqukkut qimagunnermut atatillugu kingornussassat agguaanneqarpata, akileraarutaagallartuusimasut akilerneqarnerisigut inaarutaasumik akileraarusigaanermik aalajangiivigineqartutut isigineqarnissaannik aalajangersagaq, qimagaasup pigisanik qimatanik kingornussassanik agguaassinertaqanngitsumik piginniinnarneranut aamma atuutilissasoq.

Pingaarnertut maleruagassaq tassaavoq, toqukkut qimaguttup ukiumi isertitaqarfigisamini piffissami toqukkut qimaguffigisaata sioqqullugu akileraarutininik B-nik akiliutigisimasaminik imaluunniit isertitaminit toqukkut qimagutinnginnermini isertitarisaanik akileraarutininik A-nik unerartitsivigineqarsimanerata inerneru, inaarutaasumik akileraarutitut naatsorsuunneqartariaqarnerannik.

Nr. 5-mut

Siunnersuutigineqarpoq, akileraaruserinermi oqartussaasut toqukkut qimaguttoqarneranut atatillugu inaarutaasumik akileraarusiinissamik piunnaasaateqarsinnaanerannut killiliussaq 4.000 koruuniniit 10.000 koruuninut qaffanneqassasoq, pigisanillu qimatanik suliaqarnermi inaarutaasumik akileraarusiinissamik piunnaasaateqatoqarsinnaanerannut killiliussaq 500 koruuniniit 2.000 koruuninut qaffanneqarluni, killissarititaasut taakkua 1975-imiit qaffaavigineqarsimanngimmata.

Nr. 6-mut

Ataatsimut akileraarusigaasarnep atorunnaarsinneqarnissaanik siunnersuutip kingunerisaanik, aappariinni toqukkut qimagaasup aningaasaqarnikkut atugarisaasa ajorseriaateqarnissaat pinngitsoortinniarlugu, siunnersuutigineqarpoq ukiumi isertitaqarfiusumi aappaasup toqukkut qimagunneratigut aappariinnerup atorunnaarfigisaani qimagaasup akileraarusigaasussaannngitsunik B-nik isertitanik akileraaruserneqartussaannngitsut killissarititaasa marloriaataannik annertussuseqartunik isertitaqarnissamut akuerineqassasoq.

Nr. 7-mut

Ataatsimut akileraarusigaasernerup atorunnaarsinneqarnissaanik siunnersuutip kingunerisaanik aapparisaq toqukkut qimagaasup aningaasaqarnikkut atugarisaasa ajorseriaateqarnissaat pinngitsoortinniarlugu, siunnersuutigineqarpoq ukiumi isertitaqarfiusumi aappaasup toqukkut qimagunneratigut aappariinnerup atorunnaarfigisaani qimagaasoq aalajangersimasumik ilanngaammik marloriaammik annertussuseqartunik atugassaqartinneqassasoq.

Nr. 8-mut

Aappariit ataatsimut akileraartussaananerit siunnersuutigineqarmat atorunnaassananerit, siunnersuutigineqarpoq aappariit aningaasarsiamik akileraaruteqaataassussat naatsorsorneranni aappariittut inooqatigiittut imminnut tunissutitinnit tunniussinerat ilanngullugit naatsorsuunneqassanngitsut ilanngunneqassanngippata, taava aappariittut inooqatigiittut nalunaaqqanissaannik piunnaasaqateqartariaqartoq.

Nr. 9-mut

Malitseqartitsinikkut allannguut pineqarpoq, nuusinermit akeqartitsineq pillugu malittarisassaq il.il. § 36a-mi nutaami siunnersuutigineqarmata.

§ 36a-mut

Imm. 1-mut

Akileraarusigaasussanik isertitat naatsorsorneranni, aquaasunik iliuutsini akinik piunnaasaqatillu, iliuutsit attaviitsuusut illuatungeriit akornanni pisimagaluarpata angusarisimasinnaasaasa, atorunnaarsannaannik piunnaasaqateqarnermi akileraartussaataasut pineqartut tassaapput:

- 1) inuinnarmit imaluuniit inummit inatsisitigulluunniit akisussaasumit aqunneqartut, imaluunniit
- 2) inatsisitigut akisussaassuseqartumik aqutsisuusut, imaluunniit
- 3) inatsisitigut akisussaassuseqartukkut suliffeqarfissuarmut atasuusut, imaluunniit
- 4) nunami allami aalajangersimasumik ingerlatsiveqartuusooq, imaluunniit
- 5) inuk inatsisitigulluunniit akisussaassuseqartuusooq nunami allamioq Kalaallit Nunaanni aalajangersimasumik ingerlatsiveqartuusooq,

Aalajangersakkami pineqarput inuinnat inatsitigullu akisussaasuusut, tassalu inuit ataasiakkaat, aktianik anpartiniluunniit pigisaqartut, inuttut namminneq pigisamik inuussutissarsiutitut ingerlatsivimmik ingerlatsisut. Taamatuttaaq atuuppoq,

soqutigisaqaqatigiittut ingerlataqartut (interessenter) kommanditistillu, tamakkua tamarmik immikkut angusaqaatinik piginneqataassutigisaminnik akileraaruserneqartagermata. Inatsisitigut akisussaassuseqartuusunut tunngatillugu pineqartut tassaapput aktiat, anpartilluunniit tunngavigalugit selskabit, piginneqatigiiffiit aammalu peqatigiiffiit, aningaasaateqarfiit il.il.

Taagorneqartuni nalinginnaasumik inuussutissarsiuteqarnermi soqutigisaqaqatigiiffiit tamarmik ilaatinneqarnissaat siunertarineqarpoq. Pisoqarsinnaassaarli, assersuutigalugu naliliinerit imminnut attaveqanngitsunit marlunniit aqunneqartoq, atunngasunik akileraarutit tungaasigut akерleriiusunik soqutigisaqartunit. Pisarneq malillugu taamatut pisoqartillugu akileraartarnermi oqartussaasut assersuutigalugu, peqataasut erseqqissumik soqutigisaqaqatigiinnerannit tunngaveqartinneqartumik naliliinermut, naqqiuteqarsinnaapput, imaluunniit sinneqartoorutiniк agguaanermik peqataasut soqutigisaqaqatigiinnerannit tunngaveqartinneqartumik. Taamatut periuseqarnerup allanngortinneqarnissaa inatsisissatut siunnersuummi siunertaanngilaq.

Nakkutigisaasunik iliuutsini aalajangersakkami pineqartuni ilaatinneqarput peqatigiit akornanni attaveqarnerit tamarmik, assersuutigalugu oqaatigineqarsinnaavoq sullissinerit, atukkiinernut tunngasut, pigisanik nuutsinerit tigussaasuunngitsunik pigisat atugassanngortinneqartut il.il.

Kalaallit Nunaanni aalajangersimasumik ingerlatsiviup nunamilu allami qitiusumik allaffiup akornanni imaluunniit nunami allami aalajangersimasumik ingerlatsivik Kalaallillu Nunaanni qitiusumik allaffiup akornanni, nakkutigisaasunik iliuutsinut tunngatillugu, taamaallaat iliuutsit aalajangersimasumik ingerlatsiviup isertitaanik naatsorsuineq pillugu malittarisassat malillugit "armslengde"-mik taaneqartartumik periutsimi piumasaaqatit, ilaatinneqassapput.

Soqutigisatigut imminnut atasuusut marluk akornanni ernialigaanngitsunik atukkiineqarpat, illuatungeriit attaviitsuugaluarpata atukkiinerusinnaanngitsumik, akileraartarnermi oqartussaasut nalinginnaasumik atukkiisarnerni erniat amerlaqataannik ernialiinermik aalajangiisinnaapput. Atukkiisorlu tamatumuuna ernianik isertitanik tamatumani pineqartunik akileraaruserneqassalluni aningaasanillu atortoq aamma taamatuttaaq ernianik ilanngaassisinnaanermik pissarsissalluni. Atugaqartuusorlu tamatumani erniatigut iluaqusigaassaaq ernianik akiliissannginnermigut. Assersuutigalugu selskabit marluk akornanni atukkiineq pineqarpat, selskabi piginnittusoq atukkiisuulluni, taamatut erniatigut iluaquteqarneq tapiissutitut akileraarusigaasussatut isigineqassaaq.

Selskabit peqatigiiffiillu aamma aningaasaateqarfiit il.il. kalaallit nunaanni akileraartarnermut inatsit naapertorlugu akileraartussaataanngitsutut immikkut taaneqartut, kisiannili selskabit ingerlatsinerinut maleruagassanut ingerlatsinerisa aaqqissuunneqarsimatillugit, selskabit isumaqatigiissutaasigut imaluunniit peqatigiiffiit maleruagassaasigut, inuinnaat inatsitigullu akisussaasuusunut assingusumik pineqassapput.

Aalajangersakkami siunertaq tassaavoq, katuuffiit, avammut ataasiusutut takutittartut, aalajangersakkami pineqartunut ilaatinneqassapput. Aalajangersakkalli pisut, imminnut atasuunngitsut peqatigiinnermi peqataasut (pigisaqatigiillutik), inatsisitigut akisussaassuseqartuq pigisaripassuk, ilaatinneqassanngillat, peqataasut tamarmik immikkut immikkoorlutik avammut takutittarpata peqataasullu immikkut toqqaannartumik inatsisitigut akisussaassuseqartumik piginneqataassutinik piginneqataappata.

Selskabit pillugit inatsiseqartitsinermi malittarisassanik pineqarput soorlu inatsisitigut malittarisassat soorlu aktiaselskabet pillugit inatsimmi kommanditaktieselskabit pillugit malittarisassat inatsisitigut malittarisassat inatsisilerinermi isumaq tunngaviusoq tunngavigalugu sanaajusut (eqqartuussiveqarnermi ileqqusoq tunngavigalugu, assersuutigalugu kommanditselskabet interesentselskabillu pillugit malittarisassat.) Selskabit pillugit inatsiseqartitsinermi malittarisassat aamma nunani allani inatsisitigut malittarisassat assersuutigalugu tuluit inatsisaat "The Limited Partnerships Act 1907", Limited Partnership-imut sinaakkusiisusooq, arlaqartutigut qallunaat inatsiseqartitsineranni kommanditselskabimut assingusoq.

Selskabit inatsiseqartitaaneranni inatsiseqartitsiviunngitsuni, selskabip isumaqatigiissutaa peqatigiiffiullu malittarisassai selskabini peqataasut akornanni pissutsinik ingerlaavartumik aqutsinermut tunngaviupput. Aammalu nalinginnaasuuvoq avatangiisinut, isumaqatigiissuteqarfigisanut pisortanullu tunngasutigut aalajangiisusumik aallaavittut tunngaviullutik.

Selskabinut il.il. aalajangersakkami pineqartunut ilaavoq, selskabimi isumaqatigiissut allagaappat oqaasiinnartigulluunniit isumaqatigiissutaalluni. Taamaasilluni selskabimi isumaqatigiissutip qanoq iluseqarnissaa pillugu piumasaateqanngilaq.

Aalajangersakkap nassataraa, partnerselkabet, kommanditselskabet interesentskabelu aammalu kalaallit nunamiluunniit allamiut assingusunik selskabii aalajangersakkami pineqartunut ilaapput, selskabilluunniit akileraartussatut isigineqanngikkaluarpata. Peqatigiiffiit namminneq akileraartussaannngitsut, aamma aalajangersakkami pineqartunut ilaassapput, peqatigiiffik inatsisitigut akisussaassuseqartumik aalajangiisusumik sunniuteqartuugunik.

Imm. 2-mut

Piumasaqaataavoq akileraartussaataasooq inummit inatsisitigulluunniit akisussaassusumit aqutaanissaa imaluunniit inatsisitigut akisussaassuseqartuusunik aqutaqarnissaa. Aqutaqarnermik oqarneq paasineqassaaq pigisaqartuunermik imaluunniit taasisinnaanernik pigisaqarnermik atugaqarsinnaanermilluunniit.

Selskabi piginnittusooq matumani selskabimik pigineqartumik nakkutiginnilluni aqutaqartutut isigineqarpoq, toqqaannartumik toqqaannartuunngitsumilluunniit selskabimi pigineqartumi aktiatigut aningaasaatit 50 procentii sinnerlugit piginnittuuguni, selskabimi pigineqartumi taasisinnaanerit 50 procentii sinnerlugit

toqqaannartumik toqqaannartuunngitsumilluunniit atuisinnaasuuguni. Taamaammat apeqqutaanngilaq nunami allami selskabiutigisami selskabi piginnittuusoq aktiatigut aningaasaliinermigut selskabimik taassuminnga piginnittuuneranik.

Aalajangiissuseqarsinnaanermut piunasaqaatit atuutsinneqarsinnaapput selskabimi piginnittuusup iluani suliffeqarfissuit selskabimit ataatsimik arlalinnilluunniit aningaasaliissutigineqartunit pilersitsiffigineqarpata, aamma selskabimit CFC-mik akiliuteqartinneqartussaasumit.

Selskabip piginnittuusup selskabimit pigisaminik nakkutiginnilluni aqutaqartutut isigineqarnissaanik nalilersuinermi, ilanngullugit nalilersuutigineqassapputtaaq aktiatigut aamma taasisinnaassuseqarnerit suliffeqarfissuarnit selskabiusunit pigineqartut (matumani naligiissumik selskabiutigisat ilanngullugit), inunnit aktianit pigisalinnit taakkualu qanigisaannit imaluunniit aningaasaateqarfimmit imaluunniit selskabimit piginnittuusumit katusseqatigiilluni aningaasaateqarfilianit imaluunniit suliffeqarfissuit selskabit taaneqartunit taakkualu qanigisaannit il.il. imaluunniit aningaasaateqarfimmit imaluunniit katusseqatigiilluni aningaasaateqarfilianit taakkunanngalu pilersitanit.

Kalaallit Nunaata avataani selskabiutigisamik nakkutiginnilluni aqutaqartutut nalilersuinermi taamaallaat inunnit aktiatigut aningaasaliissuteqarsimanermit aktianut aamma taasisinnaanernut pisinnaatitaanerit, taakkua kisimiilluni imaluunniit arlariuilluni aningaasaateqarfimmit imaluunniit katussilluni aningaasaateqarfimmit inunnit taakkunanga pilersinneqarsimasumit imaluunniit aningaasaateqarfik imaluunniit siullullugu taaneqartunit aningaasaateqarfimmit kalaallit nunaanni selskabimik piginnittuusumik nakkutiginnilluni aqutsisuuneranik nalilersuinermi ilanngunneqassapput.

Kalaallit nunaata avataani selskabimi D1-imi nakktugalugu aqutsineqassaaq, selskabip piginnittup M-p piginneqataassusaanit, M-mi kisimiilluni imaluunniit selskabip pigisap D2, D1-imi aktiatigut piginneqatigiissutsit 50 procentit taakkualuunniit sinnerlugit piginneqataassuseqaruni.

Taamaallaat isiginiarneqassapput selskabimi pigisami aktiatigut piginngisat annertussusaat. T.i. selskabip pigisap aktiatigut uninngasuutaanit tamakkiisunit isiginninniartoqassanngitsoq.

M-p D2-mi aktiatigut piginneqataassutsit tamakkiisut piginngikkunigit, D2-p D1-imi aktiatigut piginneqataassutiginngisaasa annertoqqataat tassaassapput M-ip piginneqataassusai ilanngutassaasut. T.i. M-p D2-imi aktiatigut piginneqataassusai 80 procentinik annertussuseqarpata aamma D2-p D1-imi aktiatigut piginneqataassusai 80 procentinik annertussuseqarpata, taava M-mi, D1-imut nakkutiginnilluni aqutsisutut nalilerneqassaaq, D1-imi aktiatigut piginneqataassutsimi 64 procentii tunuliaqutaralugit (80 procentip 80 procentia).

M-p D2-mi aktiatigut piginneqataassutsit 70 procentii pigigunigit, D2-llu D1-imi aktiatigut piginneqataassutigisai 70 procentiuppata taava M-ip piginneqataassutsini tunngavialugit D1-imik nakkutiginnilluni aqutsisutut taaneqassanngilaq tassa



aktiatigut piginneqataassutsit 49 procentii anguneqaannassammata, t.i. 70 procentip 70 procentia.

Taasisinnaassutsit tunuliaqutaralugit selskabimik nakkutiginnilluni aqutsisinnaaneq pisarpoq, selskabi piginnittoq kisimiilluni imaluunnit selskabitigut nakkutiginnilluni aqutamigut imaluunniit selskabinik allatigut nakkutiginnilluni aqunneqartunik ilaqarlutik taasisinnaassutsit 50 procentiinik peqartut.

Pisuni M-ip toqqaannanngikkaluamik taasisinnaassutsit D1-imi pigineqartut, tassa pisuni M-ip aamma D1-ip akornanni selskabimik pigisamik D2-imik piginneqataassutsimik ilanngussisoqarsimanerani, aalajangiisuvoq M-ip D2 nakkutigalugu aqutarineraa qulakkiissallugu, taamaasilluni D2-p D1-imi taasisinnaassutsimik atuisinnaanera aalajangersinnaallugu. D2-imi taasisinnaassutsit M-mimit 50 procentit sinnerlugit pigineqarpata, taava D2-p taasisinnaassusai M-ip D1-imik nakkutiginnilluni aqutsisuuneranik nalilersuinermi tamakkiisumik ilanngunneqassapput.

Pisuni M-ip D2-imi taasisinnaassutsit 70 procentiinik pigisaqartillugu aamma D2-p D1-imi taasisinnaassutsit 70 procentiinik peqartillugu, taava M D1-imi taasisinnaassutsit pigisanik tunuliaqutaralugit nakkutiginnilluni aqutsisutut atuisinnaanerinik taaneqassaaq.

Taasisinnaassutsit atorsinnaanerinut nalilersuinermi aktiatigut aningaasaliissutinik piginnittut allat killilernerqarsinnaanerinik isiginiarneqassapput. Assersuusiukkaanni aktiatigut aningaasaliissuteqartut piginnittut akunnerminni isumaqatigiissusiorsimanerannik, piginnittut allat taasisinnaanerinik killiliisumik, imaluunniit aktiatigut piginneqataassutsinut arlaannut taasisinnaaneq atorunnaarsinneqarsimappat, taava tamanna M-ip D1-imi taasisinnaanerinik 50 procentinik sinnerlugilluunnit peqarnerseq nalilersuinermi ilanngunneqassapput.

Assersuutigalugu M-mi taasisinnaassutsimini naliusoq, tak. D1-imi maleruaqqusat taamaallaat taasisinnaassusaa 45 procentiuppat, aamma D1-imi aktiatigut piginneqataassusilik ataaseq arlallilluunniit ilaannakuusumik tamakkiisumilluunniit piginnittut akunnerminni isumaqatigiissusiornermikkut taasisinnaassutsiminnik atuisinnaanerminnik atorunnaarsitsisimappata, taava M-mi D1-imik nakkutiginnilluni aqutsisuusutut isigineqarsinnaavoq. Taamaasilluni aalajangiisoq tassaavoq taasisinnaassusiviit pigineqarnerisa amerlassusaat.

Toqqaannartuunngitsumik oqaatigineqarpoq, aktienik piginneqataassutsit taasisinnaanerinu kalaallit nunaniluunniit allamiut selskabii il.il. aqutigalugit pigineqartut, nakkutiginnittuunerup naliliviginiarnerani aamma ilaatinneqartut.

Aalajangersagaq atorneqassaaq assersuutigalugu aningaasaateqarfik ingerlatsisuniluunniit assigiinngitsunik ingerlanneqaralarpat, ingerlatsisut ataatsimoorussamik ataatsimut pigineqartumik selskabimik siulersuinissamik isumaqatigiissuteqarsimappata. Taamaattumik siunnersuutigineqarpoq, aningaasaateqarfik selskabimi aalajangiisuusumik nakkutiginnilluni sunniuteqartuunersoq naliliiffigineqassatillugu, piginneqataassutsit

taasisinnaassuseqarnerillu, selskabinit allanit, aningaasaateqarfimmit aalajangiisuusumik nakkutiginnilluni sunniuteqarnissamik isumaqatigiissuteqarfigineqarsimasunit, pigineqartut ilanngunneqassasut. Tamatumunnga peqatigitillugu siunnersuutigineqarpoq, aalajangersagaq immikkut akileraartussaasunut soorlu aktieslskabenut aammattaaq atuutissasoq. Taamaattumik Transfer Pricing pillugu malittarisassat, selskavit marluk, selskabimi, (50/50)-imik pigisaminni ataatsimoorussamik aalajangiisuusumik nakkutiginnillutik sunniuteqarnissamik isumaqatigiissuteqarsimappata, atuutilissapput.

Tamanna ataatsimoorussamik aalajangiisuusumik nakkutiginnilluni sunniuteqarnissamik isumaqatigiissummik toqqaannartumik naliliinermik tunngaveqassaaq. Tamatumani naliliinermi ilaatinneqarsinnaapput isumaqatigiissut nassataqarnerisoq:

- taasisinnaanerit amerlanersaannik ataatsimoortumik atuisinnaaneq,
- selskabimi qullersaasutut aqutsisuusut amerlanersaannik ataatsimoorluni toqqaanissamik soraarsitsinissamilluunniit imaluunniit
- selskabip ingerlanneqarneranut aningaasalersugaaneranullu tunngasunut qullersanut ataatsimoorussamik aalajangiisuusumik nakkutiginnikkut sunniuteqarneq.

Ataatsimoorussamik aningaasaliinermi peqataasut, sammisaqarfigisanut arlaqartunut ataatsimoorussanik najoqqutassanik isumatigiissuteqakkajuttarput, assersuutigalugu aktianik pigisaqartut akornanni isumaqatigiissummik. Tamanna tassaasinnaalluni:

- Allanit pisinissamut aningaasaliinermut siunissami aningaasaatinik qaffaanerni peqataasinnaanermi minnerpaamik aningaasaliinissamik/piginneqataassuteqarnissamik piumasagaat
- Aktianik tunisaqartuusup piumasagaataatut ittunik piumasagaarluni tinisisinnaanermik piumasagaarneq aammalu aktianik tunisaqartuusup piumasagaarluni tunisisinnaanermut pisussaaffeqarnissamik (taaneqartartoq along & drag along).
- Aningaasaliissuteqarnermi ataatsimoortumik iliuusissanik isumaqatigiinneq (aningaasaliinermut atatillugu siunissaq, peqataajunnaarsinnaanissami periuseq salliutinneqartoq).
- Siulersuisussanik ataatsimoorluni toqqaanissamik siulersuisullu suliassaat pillugit isumaqatigiinneq (aalajangersakkat ataatsimiinnerit, aaliangiisoqarsinnaassappat qassiunissaq, amerlanerussuteqarneq pillugu malittarisassat, aalajangiinerit ilaanni amerlanerussuteqarluarnermut piumasagaatit il.il. pillugit aalajangersakkat siulersuisut suleriesissaanut malittarisassaniikkajuttartut.

Aktiaateqartut akornanni isumaqatigiissut immiini, ataatsimoorussamik aalajangiisuusumik nakkutiginnilluni sunniuteqarnissamik isumaqatigiissuteqarsimanermut aalajangiussinissamut naammangilaq.

Aktiateqartut isumaqatigiissutaasa ilaanni assersuutigalugu tuniniaanermi pisisussatut salliutinneqarnissaq pillugu aalajangiinernik aamma qularnaveeqqusiisinaanermik killiliinernik imaqartarput. Aalajangersakkat tamaattut imminni ataatsimoorussamik aalajangiisuusumik nakkutiginnilluni sunniuteqarnermik kinguneqarneq ajorput.

Imm. 3-mut

Malittarisassatut siunnersuutigineqartuni aamma akileraartussaataasut, suliffeqarfissuarmut inatsisitigut akisussaassuseqartuusoq aqutigalugu atasuusut pineqartunut ilaapput.

Selskabit suliffeqarfissuarmut atasuusutut isigineqarput selskabit peqatigiiffiillu il.il.:

1) aktiateqartunit taakkuusunit toqqaannartumik toqqaannangitsumilluunniit selskabini tamani aktiatigut aningaasaatit 50 procenti sinnerlugu pigisaqarfigineqartut,

2) toqqaannartumik toqqaannartuungitsumilluunniit selskabini tamani taasisinnaanerit 50 procentii sinnerlugu atuisinnaasut.

50 procenti sinnerlugu nakkutiginnikkut sunniuteqartuuneq assersuutigalugu aktiaatillit akornanni isumaqatigiissummut atatillugu piusinnaavoq.

Toqqaannartuungitsumik pigisaqarneq tassaavoq, selskabit allat, aktiateqartut taakkuusut aktiatigut aningaasaatit 50 procent sinnerlugu piginniffigisaat aqutigalugu piginnittuuneq. Taamatuttaaq toqqaannartuungitsumik taasisinnaaneq tassaavoq selskabit allat, aktiateqartut taakkuusut taasisinnaanerit 50 procentii sinnerlugit atuisinnaaffigisaat, aqutigalugu taasisinnaassuseqarneq.

Taasisinnaanermik piginneqataanerup naatsorsornerani taasisinnaanerit, aktianik qularnaveeqqusiilluni taasisinnaanermik nuussinikkut, pissarsiarineqartut, naatsorsuutigineqassaangillat. Selskabip selskabimi allami pisassarisani akiligassaqartumi aktianik qularnaveeqqusiilluni qulakkeersimappagit, selskabi tamatumuuna suliffeqarfissuarmut atasuusutut, taasisinnaaneq, akiligassaqarfigisap qularnaveeqqusiinermut atatillugu pissarsiarisimasinnaasai, kisiat tunngavigalugu, suliffeqarfissuarmut atasuututut isigineqanngillat.

Erseqqissarneqassaaq taasisinnaassutsit naatsorsorneranni, aktianik qularnaveeqqusiilluni taasisinnaassutsinik pissarsinerit taasisinnaassutsit naatsorsornerini ilanngunneqassanngimmata, tassa qularnaveeqqusiisoq taasisinnaagaluarluni aktianik piginnittuunnginnera pequtigalugu.

Peqatigiiffik soorunami inuinnarmut imaluunniit inatsisitigut akisussaassuseqartuusumit pigineqarsinnaanngilaq, inuulli imaluunniit inatsisitigut akisussaassuseqartuusup peqatigiiffik peqatigiiffiup malittarisassaani aalajangersakkat imaluunniit ilaasortanik allanik isumaqatigiissutit aqutigalugit nakkutiginnilluni aqutarisinnaavaa. Taamatut nunami allami peqatigiiffimmik

aqutaqarnerup CFC-mik akileraarusigaanermik kinguneqarsinnaaq. Inatsisitigut akisussaasuseqartuusut, kalaallit malittarisassaasut malillugit immikkut akileraarsinnaasutut isigineqarsinnaasut tamarmik, CFC-mik akileraarusiineramik nassataqarsinnaapput.

Imm. 4-mut

Inuup selskabimik nakkutiginnilluni aqutsisuuneranik nalilersuinerami aamma aktiatigut aamma taasisinnaassutsit amerlassusaasa, matumani aningaasaateqarfiit imaluunniit katusseqatigiilluni aningaasaateqarfiit taakkuusunit pilersinneqartut amerlassusaannik naatsorsuutigineqassapput.

Imm. 5-mut

Inuk inatsisitigulluunniit akisussaasuseqartuusooq nunami allamiutut isigineqassaaq, inuk nunami allami, Danmarkimi Savalimmiuniluunniit nunaqarpat, tamatumani aamma marloriaammik akileraarusigaannginnissamik isumaqatigiisummi aalajangersakkat malillugit, soorlu assersuutigalugu kalaallit nunaanni akileraarusiisoqassannginneranik, nunami selskabip aqutsisuisa angerlarsimaffigisaani akileraarusiineqartillugu, t.i. selskabip ulluinnarni aqunneqavilluni ingerlanneqarnerani akileraarusiineq.

Imm. 6-mut

Siunnersuutigineqarpoq aningaasarsiat akileraaruteqaataasussat angissusiliivigineqarnerata imm. 1 naapertorlugu allanngortinneqarnerini, akileraartussaataasup annertunerusumik malitseqartitsinikkut allannguinerit (malitsigisatut iluarsinerit) pinngitsoortissinnaavai, imm. 1-imi akit piumasaqaatillu naapertorlugit akiliinissamut pisussaalerneqartut. Imm. 1 taamaallaat atorneqassaaq nakkutigisaasumik iliuutsini § 36 b-mi pineqartumik pisoqartillugu, akileraarternemut oqartussaasooq nunami allamioq pineqartoq akileraarusiissappat, isertitanik akileraarutaasussanik imm. 1 naapertorlugu annertussusilerneqarneranni akit piumasaqaatillu tunngavigineqartut naapertorlugit.

Selskabip piginnittuusup selskabi pigisani erniaqanngitsumik taarsersugassanik aningaasanik atukkersimappagu, imm. 1-lu naapertorlugu ernianik „armslengde“-imik taasamik periuseqarluni angissusilerneqarsimappat, taava imm. 1 naapertorlugu naqqiuteqarnerup kingunerissavaa, selskabi piginnittuusup ernianit taakkunanga akileraaruserneqarneranik, selskabilu pigineqartoq erniatigut annertoqqataanik ilanngaasiineqartinneqassalluni. Aammattaarli selskabi pigisaaq kalaallit maleruagassaasut naapertorlugit selskabimit piginnittumit tapiiffigineqartutut periutsit malillugit akileraaruserneqassalluni. Tapiissut taanna erniatigut sipaarutaasut annertoqqatigissavaat, erniat selskabimut piginnittuusumut akilerneqanngimmata. Selskabi pigineqartuusooq malitseqartitsinikkut aningaasarsianik akileraaruteqaataasussanik naatsorsuinerami allannguuteqartitsineq pinngitsoorsissaguniuk, taava malittarisassaasut malillugu imm. 1-imi erniatigut naliliussaasut aalajangiunneqartoq assigalugu selskabimut piginnuttumut akiliuteqarnissaminik pisussaaffilerneqarsimassaaq.

Selskabi piginnittuusoq nunami allaminngaanneersuuppat, taava nakkutigisamik iliuseqarneq § 36b naapertorlugu iliusaasimassaaq. Kalaallit Nunaanni selskabip pigisap tapiiffigineqarnermigut malitseqartitsinikkut allannguuteqartitsinissamik pinngitsoortitsissaguni, taava selskabip piginnittuusup nunagisaani pisortat akileraarusiisartut selskabi piginnittuusoq imm. 1-mi erniatigut nali aalajangiunneqartoq naapertorlugu akileraarusiisimanissaa qulakkeerneqarsimassaaq.

Malitseqartitsinikkut allannguuteqartitsinissamik iliuseqarneq isumaqarpoq „armslengde“-mik taasap periutsip naapertorlugu akiliuteqartitsinermik pisoqarsimanngitsillugu, pissutsini taasami akit naapertorlugit akiliuteqarsimanermi naqqiuteqarnerit. Oqariaaseq „malitseqartitsinikkut allannguuteqartitsinerit" transfer pricing (Transfer Pricing Guidelines for Multinational Enterprises and Tax Administrations) pillugu maleruaqqusat OECD-p aalajangersagaanut aammattaaq naapertuuttuupput.

Imaappat akileraartussaataasup imm. 1-imi akit aamma piunasaqaatit aalajangiunneqartut naapertorlugit akiliuteqarnissaminut pisussaaffilerneqarsimalluni atuinissaminik kissaateqarpat, imm. 1 naapertorlugu naqqiuteqarnermut atatillugu akiliuteqarnissamut pisussaaffik taanna ingerlanneqarsimasussaavoq. Naqqiuteqarnermut maalaaruteqarnerup kingunerisaanik akiliuteqarnissamut pisussaaffeqarnermi piffissarititaasoq innarlissanngilaa. Akiliuteqarnissamut pisussaaffeqarnerup tunngaviusumik nakkutigisaasumik iliuseqarnerup piffissap nalaanit atuutsinneqalissaaq, taamaammallu assersuutigalugu piffissamit tassangaanniit ernialersuineramik naatsorsuisoqalissalluni.

## § 36b-mut

### Imm. 1-mut

Nakkutigisaasumik iliuseqarnermi tamaginni paasissutissanik tunniussisussaataitanermut piunasaqarneq, akileraartussaataitanut imatut:

- 1) nunami allamiunit inummit imaluunniit inatsisitigut akisussaasumit (selskabimit) nakkutigisaasumik aquunneqartut,
- 2) inatsisitigut akisussaasumit nunami allamiittumit nakkutigisaasumik aquunneqartut,
- 3) suliffeqarfissuarmut atassuteqaqatigiilluni inatsisitigut akisussaasumut nunami allameersumut,
- 4) nunami allami aalajangersimasumik ingerlatsiveqarluni, imaluunniit
- 5) nunami allamiunit inummit imaluunniit inatsisitigut akisussaasumit Kalaallit Nunaanni aalajangersimasumik ingerlatsiveqarluni.

Kalaallit selskabiisa il.il. kalaallit selskabiinut il.il. allanut nakkutigisaasumik iliuseqarnermikkut assingusumik periuseqartut, t.i. kalaallit suliffeqarfissuaataanni

(kalaallit nunaanneersuinnarnit) nakkutigisaasumik iliuuseqarnerit, selskabit aningaasarsiaasa angissusiliivigineqarneranni uppersartussaavaat, nakkutigisaasumik iliuuseqarnerminni akit aamma piunasaqaatit „armslengde“-mik taasami periutsini piunasaqaatit naapertorlugit aalajangersarneqarsimanerisa iliuusaasimaneri. Kalaallit selskabiutaat taamaattuusut maleruagassani siunnersuutigineqartuni ilaatinneqanngillat, taamaammallu nammineerlutik nalunaarusiornerminnut atatillugu paasissutissanik assingusunik tunniussisussaataatanatik, aammalu tunngaviummik nakkutigisaasumik iliuuseqarnermikkut periutsini allaganngorlugit uppersaasussaataatanatik.

Nammineerluni nalunaarusiortussaataaneq (aamma paasissutissanik tunniussisussaataaneq ilanngullugu) akileraartussaataitami nakkutigisaasumik iliuuseqarsimasumi pisussaaffiuvoq.

Kalaallit Nunaanni aalajangersimasumik ingerlatsiveqarluni, nunamilu allami qitiummik allaffeqarfeqartuni, imaluunniit nunani allami aalajangersimasumik ingerlatsiveqarluni Kalaallit Nunaannilu qitiummik allaffeqartuni, nakkutigisaasumik iliuuseqarnerit eqqarsaatigalugit, taamaallaat nakkutigisaasumik iliuutsit aalajangersimasumik ingerlatsiveqarluni „armslengde“-mik taasap periutsip malinneritigut naatsorsuinerit taamaallaat siunnersuutigineqartumi § 36b-imi maleruagassanut nakkutigisaasumik iliuuseqarnerit ilanngunneqassapput.

Nammineerluni nalunaarusiornermut atatillugu nakkutigisaasumik iliuuseqarnerit suussusaannik aamma annertussusaannik paasissutissat nalunaarutigineqassapput. Matumani paasissutissat kisitsisit ilivitsunngortitat pineqarput. Nammineerluni nalunaarusiorfinni paasissutissanik pineqartunik allattuiffissianik pilersitsisoqassaaq. Paasissutissat eqqarsaatigineqarput eqimattakkaarlugit nalunaarutigineqassasut soorlu assersuutigalugu nioqutissat suuneri, sullissigasuarnerup suussusaa, aningaasalersuineq il.il..

Paasissutissat tunniunneqartut akileraaruserisunut suliffeqarfinnik immikkoortiterinissamut taakkua ersarinnerusumik misissuivigineqarnissaat siunertaralugu kissaatigineqartunut, ikiorsiutaasinnaannissannut naatsorsuutigineqarput. Imm. 2 naapertorlugi suliffeqarfiit nammineerlutik aalajangertussaavaat paasissutissanik allanik ilanngussillutik nalunaaruteqarusunnerlutik. Akileraaruserisunit paasissutissat allat pineqartut nalilersuuteqarnissamut naammagineqarpata, taava tulliusumik misissuivigineqarnissaq pisariaarutinngikkuni pinngitsoortinneqavissinnaavoq.

Imm. 2-mut

Nakkutigisaalluni iliuuseqarnermi akit piunasaqaatillu aalajangersarneqarsimanerannut paasissutissat, imm. 1 naapertorlugi akileraartussaataitasunut maleruagassat malilllugit suliarineqarlutillu allaganngorlugit paasissutissiissutigineqartussaapput.

Allaganngorlugit paasissutissat imatut suliarineqarsimasussaapput, akit piunasaqaatillu nakkutigisaasumik iliuuseqarnermi imminnut

atassuteqaateqanngitsunut iliuuseqarnermut sanilliullugit assersuutitut angusaasunut nalilersuutigineqarsinnaasunngorlugit („armslengde"-mik taasap periutsip).

Maleruagassani toqqaannartumik taaneqanngilaq akileraartussaataitaasup uppersaatitut suut suliarissanerai. Suliffeqarfiit aqqissuussaanerisa aamma suliaqarfiisa assigiinngitsuunerisa tamatuma ajornakusoortippaa. Aammattaaq „armslengde"-mik taasap periutsip naapertorlugi akit piunasaqaatillu tunngaviumik akileraartussaataitaasumit namminermit nalilersoruminarerupput paasissutissat suut taakkununga takussutissiarissallugit pitsaanerunersoq.

Akileraartussaataitaasut minnerpaamik akit piunasaqaatillu nakkutigisaasumik iliuuseqarnermi tunngaviumik angissusilerneqarsimaneri paasissutissiissutigisussaavaat. Assersuutigalugi akit piunasaqaatillu aalajangerneqarsimaneri allamut soqutigisaqaqatiginngisamut tunisinermit akit piunasaqaatillu assigalugit annertussusilerneqarsimaneri pillugit pisimappat, taava tamanna nalunaarutigineqassaaq, nikingassutaasimasinnaasullu tunngavilersukkamik paasissutissiissutigineqassallutik. Akileraartussaataitaasoq allamut soqutigisaqaqatigiinngisamut tunisaqarsimanngikkuni aammalu nioqqtigineqarsimasunut assingusinnaasunik peqartoqanngippat, taava periarfissatut allatut suliffeqarfissuup ilanngaaseereernermit angusaa nalilersuutigalugi qiviarneqarsinnaavoq. Ilangaaseereernermit angusaaq suliffeqarfissuup iluani suliat suussusaannut tunngatillugi agguarneqartarpoq. Nioqqtissaq pineqartoq pillugi akileraartussaataitap suliffeqarfissuarmi iluanaarut pissarsiarisaa, allatut oqaatigalugi suliat suussusaannut nioqqtissap pineqartup akileraartussaataitap suliarineqarsimasumut illua'tungiliisussaavoq.

Qulaani assersuutit taaneqartut OECD-p akit nikerarnerisa periusaannut aamma iluanaarutini agguagarsisitsisarnermit periutsinut maleruagassiaanut naapertuuttuupput.

Maleruagassanut pineqartunut sanilliullugi ilimanaateqarpoq naatsorsuisarnerit, ullumikkut akinik pilersitsisarnerit isumannaarisarnerillu pillugit annertuumik taasarialimmik nikingassuteqarunnginnerinik. Siunnissamili naatsorsuinerit taamaallaat allagaatigineqalissapput.

Aammattaaq naliginnaasumik ilaatigut siunertaalluassaaq paasissutissanik ukuninnga tunniussisoqartarpat:

- 1) Nakkutigisaasumik iliuuseqarnermi suliffeqarfiit peqataatinneqartut pillugit,
- 2) Nakkutigisaasumik iliuuseqarnermi suussutsip nalunaarutiginera,
- 3) Suliffeqarfinit ataasiakkaanit suliat suliarineqarnerisa suussusaat (soorlu assersuutigalugi sumi suliarineqarfii, piseqqusaarutit, tuniniaanertigit siammarteriffiit, pisiniarnerit il.il.) aamma uku pillugit

4) Akileraartussaataasoq imaluunniit suliffeqarfit atassuteqaqataasoq suliffeqarfinnut atassuteqarfiginngisanut iliuuseqarnerini assersuutigineqarsinnaaneri (nakkutigisaasumik iliuuseqarnerit pinnagit)

Qulaani pissutsinut pineqartunut paasissutissiineq akinik aalajangersaanernut naliliissutigissallugit tunngavissiinissamut naammaginangippata, taava pisariaqassaaq saniatigut paasissutissiinissaq. Soorlu assersuutigalugu aningaasalersuineq eqqaaneqarsinnaapput, niueqatigiinnissamut piumasaqaatit pillugit allannguuteqartitsinernut paasissutissiinerit imaluunniit isumaqatigiissutaareersunik atuutsinneqartunik isumaqatigiissuteqaqqinnerit, nunani allani suliffeqarfiit pillugit nakkutigisaasumik iliuuseqarnerinik suliffeqarfittut atassuteqaqatigisamut paasissutissiineq, suliffeqarfiit assersuutigineqarsinnaasut nakkutigisaasumik iliuuseqarlutik assersuutigineqarsinnaasut nalunaarusiorneri.

Nuussinerni akeqartitsinermik sulianik pitsaaqutaasinnaasoq suliffeqarfik arlaannaalluunniit pillugu nakkutigisaasumik iliuuseqarnek pillugu paasissutissiigaanni. Paasissutissat taakku ukuusinnaapput:

- 1) suliffeqarfiit pillugit nalunaarusiornerit
- 2) aaqqissuussaannerup ilusilernera
- 3) suliffeqarfissuup iluani piginnittunut pissutsit
- 4) tunisat annertussusaat aamma nakkutigisaasumik iliuuseqalersigani ukiuni siuliini angusat aamma
- 5) akileraartussaataitap nunami allami suliffeqarfinnut nakkutigisaasumik iliuuseqarnerata annertussusaa.

Aammattaaq pitsaaqutaassaaq akit aalajangersarneqarnerisa paasissutissiissutigisarneri, matumanilu nakkutigisaasumik iliuuseqarnerup isumaqatigiissutip annertuup iluaniitsinneqarneranik paasissutissiineq.

"armslengde"-mik taasap periutsip atornerarneranut atatillugu pisuni amerlanerpaani peqqutissaqarluarpoq taakku pillugit aammalu iliuusitut periutsit suunerinik paasissutissiissalluni. Naliginnaasumik tunngaviusumik ileqquusumik nakkutigisaasumik iliuuseqarnermi periutsit aalajangersarneqarnerisa suunerinik eqqartuisoqartarpoq (akit tunngavigalugit niuernermi periutsit tamatigoortut, tuniseqqittarnermi akinik aalajangersaasarnerni periutsit aamma tunisaqarnermi akinik aammalu iluanaarutit ilanngullugit periutsinik), periutsilli allat aamma atuutsinneqarsinnaasarput. Tunngaviusumik suliffeqarfiit ataasiakkaat namminneq naliliineri, periutsit suut suliffeqarfiup ingerlassaanut peqqutissiilluarnerunersut eqqaassallugit aamma pissutsit allat ilanngullugit.

Akileraaruserisut taamaallaat paasissutissat pisariaqartititik kisiisa pissarsiariniartariaqarpaat aamma ilaatigut qulakkiissallugu, paasissutissiisussaatitaanermikkut atuutsitsiniarnermi suliffeqarfiit



niueqatigiissutigisartakkallu isumaqatigiissutaat isortortut inuiaqatigiinnut saqqummiutinnginnissaat. Kalaallit Nunaanni suliffeqarfiit sulianik ingerlatsinermut maleruagassani nipangiusimasussaatitaanermit maleruagassanit illersugaapput. Peqqutissaqarluassaaq akileraaruserisut aamma akileraartussaatitaasut nakkutigisaasumik iliuuseqarnermi pissutsit atorneqartut "armslengde"-mik taasap periutsip maleruagassaanut naapertuuttuunersut paasiniarnerini suleqatigiissutigigunikkik.

Akileraartussaatitap nakkutigisaasumik iliuuseqarnermi akit peqqussutillu aalajangersarneqarnerinik suliaqarlunilu aamma allaganngorlugit uppersaasiinissani isumagissavai. Uppersaasussaatitaanermit peqqusineq taanna ukiuni tallimani atuuttussaavoq. Tamanna naatsorsuuserisussaatitaanermit maleruagassanut uppersaasussaatitaanermit peqqusinermit naapertuuppoq.

Imm. 3-mut

Nakkutigisaasumik iliuuseqarnermit atatillugu akileraartussaatitap imm. 2-mi uppersaasussaatitaanermit maleruagani suliaqarsimangippat taava imm. 3-mi aalajangersakkat atuutsinneqalissapput. Akileraartussaatitap nammineerluni nalunaarumminut ilanngullugu uppersaasiissutissani allaganngukkani ilanngutinngippagu taava nammineerluni nalunaarummik tutsiuginangitsumik tunniussisutut isigineqassaaq akileraarutissallu qaffaavigineqarsinnaassallutik taamaattorli annerpaamik 2.000 kr.-inut, akileraaruserineq pillugu ingerlatsinermut inatsisartut inatsisaanni § 19 naapertorlugu.

Tamatuma saniatigut akileraaruserisut selskabip aningaasarsiai akileraaruteqaataasussat missangersuinikkut angissusiliivigisinnaavaat.

§ 36c-mut

Imm. 1-mut

Annikitsumik aningaasalersuinerup maleruagassiuunneqarnerata siunertarivaa Kalaallit Nunaannit nunanut allanut akileraarutissanik piumasamik nuussuisoqannnginnissaata illua' tungilersimaarneqarnissaa, nunatta avataani suliffeqarfissuit selskabet nunatsinniittut pigisatik, suliffeqarfissuup iluani suliffeqarfiit ingerlanneqartut allat assignagit aningaasaliiffigineqarnerisa allaanerunnginnissaat. Tamanna nunatsinni selskabiutigisap erniatigut ilanngaaserneqarsinnaanerata killilerneqarneranik aamma nunani allani piginnittuusunut akiitsut naliisa nikerarneranit annaasaqaatinik killiliinikkut imaluunniit suliffeqarfissuup iluani selskabinut tunngatillugu atuutsinneqassaaq.

Ilanngaasiisinaanermit killiliineq pillugu maleruagassanik atuutsitsinnginnermi, piunasaqaatit arlallit atuutsinneqarsimassapput. § 1, imm. 1, nr. 3-14 maleruagassat naapertorlugit selskabiussaaq imaluunniit peqatigiiffik, nunani allani suliffeqarfissuuartut selskabitut atassuteqaqatigisamut aningaasanik taarsigassarsianik attartortoq, taassuma ukiup aningaasarsiorfiusup naanerani akiitsui nammineq

anigaasaatigisanut naleqqiullugu pissutsinut 2:1-imit annertunerusumik akiitsulinnut.

Nr. 1-imi siunnersuutigineqartutut maleruagassanut ilaatinneqarput akileraartussaaitat killilerneqarneri. Tamatuma kingorna maleruagassanut ilanngunneqarput aktiatigut aamma anpartitigut selskabet Kalaallit Nunaanni angerlarsimaffeqartut aamma peqatigiiffiit § 1, imm. 1, nr. 3-14 taasat (matumani selskabet pigisat) § 1 malillugu tamakkiisumik akileraartussaaitaasut.

Nr. 2-imi selskabinut pigisanut maleruagassaq atuuppoq taakkua nakkutigisaasumik iliuuseqarnerup piginnittuisa iluini imaluunniit selskabet suliffeqarfissuit iluini soqutigisaqaqatigiinnit aningaasanik taarsigassarsiaqarsimasunut. Nakkutigisaasumik iliuuseqartut piginnittui § 36 a-mi ersarissarlugit taaneqarput. Aningaasanik taarsigassarsisitsisuusartut pineqartut tassaasarpur nunani allamiut inuinnaat, selskabet, aningaasaateqarfiit, ataqatigiilluni aningaasaateqarfiit aamma toqusut pigisaasa agguargarsiaanit, taakkua inuit ataasiakkaat imaluunniit inatsisitigut akisussaassuseqartumik piginneqatigiittut il.il.Kalaallit Nunaanni selskabimut piginnittuuneri eqqarsaatiginagilluunniit nakkutigisaasumik iliuuseqarnerup maleruagassaanut sanilliullugit. Piginnittuunernut peqataaneq naammappoq.

Inuit imaluunniit inuit inatsisitigut akisussaassuseqartut pillugit paasinninniarnermi § 36a, imm. 5-imi oqaaseqaatigineqartunut innersuussineqassaaq. Apeqqutaanngilaq nunani allani selskabip kalaallit nunaanni selskabi nakkutigisarineraa, taanna aammaarluni kalaallimit aktiatigut pigineqaraluarpuunniit. Aammattaaq apeqqutaanngilaq nunani allaniit aningaasanik taarsigassarsisitsisoq qanorluunniit selskabimi aningaasanik attartortumik piginneqataassuseqarneranik, taakkua selskabet suliffeqarfissuup iluanni pigisaagalarpataluunniit.

Naggasiisumik imm. 3-mi piumasqaateqarpoq, selskabimit pigisamit akiitsut (suliffeqarfissuup iluani akiitsut aamma akiitsut allat ataatsimut isigalugit) annertussusaasa aamma taassuma namminerisamik aningaasaaliissutigineqarsimanerata ukiup isertitaqarfiusup naanerani pissutsinut 2:1 qaangerneqarsimannginnissaannik.

Ilanngaasiisinaanermik killiliinerup malitsigissavaa, suliffeqarfissuit iluini nunanit allanit attartukkat erniatigut aningaasartuutigineqarnerisa aamma aningaasaaliissutit nikerarnerannit annaasaqaatitigut ilanngaasiisoqarsinnaannginneranik, taakku pissutsit selskabip pigisap akiitsuisa taakkualu namminerisamik aningaasaataasa, aningaasat attartukkat suliffeqarfissuup iluani attartugaatillugit ukiup isertitaqarfiup naaneranut naatsorsuullugit pissutsit 2:1-imut qaangiisimannginneranni. Aningaasat nikerarnerisa annaasaqaataaffigisaat, aningaasat nikerarnerisa iluanaaruteqaataaffigisaanit attartukkanit ukiumi tulliusumi taamaattoq ilanngaatigineqarsinnaassallutik, tak. Imm. 2.

Imm. 2-mut

Ukiumi isertitaqarfiusup tulliani attartukkanut pineqartunut atatillugu siunnersuutigineqarpoq aningaasat nikerarnerannit annaasaqaatit aningaasat nikerarnerisa iluanaaruteqaataaffigisaanit ilanngaatigineqarsinnaasariaqarnerannik. Aningaasat nikerarnerisa annaasaqaatigineqarneri ukiuni tulliusuni ilanngaatigineqarsinnaannginneri peqqutigalugit, ilanngaasiisinnaaneq annaaneqavissaaq.

Aningaasat nikerarnerisa annaasaqaataanerisa ilanngunneqarnerisigut ernianut arlalitsigut akileraaruserinerup inatsisaani ernianut attuumatinneqanngitsunut, soorlu assersuutigalugu (sinneqartoorutit tunngavigalugit) erniat, maleruagassanut ilanngunneqarsinnaassapput. Maleruagassanuttaaq ilanngunneqarsinnaassapput akiitsunik pilersitaareersunik tigusinikkut ernialersuinerit, kurs 95-imut soorlu akilersillugit tiguneqarsimasut, piffissami aalajangikkami kurs 100-imik akilerneqartussanngortut. Aningaasalli nikerarnerisa nalingisa annaasaqaataanerat ukiumi tulliusumi attartukkanut taakkununga attuumassuteqarpata aningaasat nalingisa qaffariaataannut ilanngaasiissutaasinnaassapput.

Akiitsut namminerisamillu aningaasaatit, ilanngaasiinissamut killiliinermi naatsorsuineri ukiumi tulliusuni naatsorsuinerit ilanngunneqartussat, tassaapput ukiumi isertitaqarfiusup naanerani akiitsut aningaasaatigisallu annertussusaat, illua'tungaani ukiumi pineqartumi ernianut aningaasartuutit aamma aningaasat nikerarnerisa annaasaqaataanerat tassaallutik ernianut aningaasartuutiivit aamma aningaasat nikerarnerisa annaasaqaataavinneri. Taamaammat ukiut tamarluinnaasa ilanngaasiisinnaanermut killiliisinnaanissaq tunngavissaqarnerisooq nalilersortuaannagassaavoq. Selskabip pigisap akileraaruserisunut ukiuni kingusinnerusukkut takussutissiisutigisinnaappagu, selskabip avataanit aningaasaliisutigineqarnerata aammalu namminerisamik aningaasaatigisat pissutsit 2:1 qaangersimajunnaaraa, ukiumi tassanerpiaq ilanngaasiisinnaanermut killiliineq atortikkunnaarneqassaaq.

Imm. 3-mut

Inummit pingajuusumit aningaasanik attartorneq maleruagassat malillugit nakkutigisaasumik piginnittunit imaluunniit suliffeqarfissuit soqutigisaqaatigiiffiinit selskabet ilanngullugit toqqaannartumik toqqaannanngikkaluamilluunniit qulakkeerinninnertut isigineqassaaq, nakkutigisaasumik attartornermut sanilliullugu. Toqqaannartumik qulakkeerinninnermut atugassaqartitsineq pisuni attartortitsinnermut atatillugu selskabi piginnittuusoq assersuutigalugu attartukkanut taarsiisinnaanissamut imaluunniit attartornermut allatigut taarsiinissamut qulakkeerinnissuteqarsimanerini pisarpoq. Naliginnaasumik aningaaseriviusinnaavoq aningaasanik attartornermut aningaasaliisutigineqartoq. Oqariaaseq toqqaannanngikkaluarmik qularnaveequsiineq attartornerni back-to-back-inik (attartukkani utertitassanit/taarsigassarsiat annertoqqataannik pisassaqaartitsilernerni) taasani pigajuttarpoq, soorlu selskabi piginnittuusoq inummut pingajuusumut assersuutigalugu isumaqatigiisuteqarpata taanna selskabimut pigisamut aningaasanik attartortitsissasoq taavalu selskabi piginnittuusoq inummut pingajuusumut aningaasanik atortitsilluni. Back-to-back-imik taasamik attartortitsineq

assersuutigalugu pisinnaasarpog selskabet piginnittuusup aningaaserivik atassuteqarfigisaata selskabimut pigisamut attartortitsinerani, tassungalu atatillugu selskabi piginnittuusog aningaaserivimmut attartortitsisumut aningaasat attartukkat annertoqqataanik uningasussanik nuutsitsinermigut. Apeqqutaanngilaq aningaasanik attartortitsisog Kalaallit Nunaanni imaluunniit nunatta avataani angerlarsimaffeqartuunera.

Aalajangersakkanut attuumatinneqanngillat inummut pingajuusumit atassuteqaqatigineqanngitsumit aningaasanik attartortitsinerit. Suliffeqarfissuit iluini attartortitsineqarpat aamma inummut pingajuusumit atassuteqaqatigineqanngitsumit attartortitsineqarpat aamma ilanngaasiisinnaanermut killiliineq atuutsinneqalissappat, taamaallaat suliffeqarfissuit iluini attartortitsinerit pisut kisimik killiliivigineqassapput taamaasilluni ilanngaasiinissamut killiliineq naatsorsugaq taamaallaat suliffeqarfissuup iluani attartornernit killiliissalluni. Ilangaasiisinnaanermik killiliinerni apeqqutaatinneqanngilaq, annertunerusumik minnerusumilluunniit nakkutigisaasumik iliuuseqarnerni nakkutiginninneq. Ilangaasiisinnaanermut killiliineq atuutsinneqalissappat, taava ilanngaasiinissamut killiliineq nunatta avataani suliffeqarfissuit atassuteqarfigisat iluini selskabit erniatigut aningaasartuutinit aamma aningaasat nikerarnerisa annaasaqaataanerani pigaluarpataluunniit, apeqqutaatinnagu selskabip piginnittuusup selskabimi pigisami piginneqatigiissutaa 60 procentinik imaluunniit 100 procentinik annertussuseqarnerat. Ilangaasiisinnaanermut killiliineq ukiumi attartorfiusumi aamma ukiumi tulliusuni pissaaq, attartortornerit pisuni 2:1-imit annertunerussuteqarfianni.

Imm. 4-mut

Suliffeqarfissuilli iluanni attuumassuteqarfiusuni aningaasanik taarsigassarsianik attortornernut ilanngaasiisinnaaneq atorunnaarsinneqassanngilaq, selskabip takussutissiissutigippagu, aningaasalersorneqarneq assingusoq suliffeqarfissuup iluani peqataasunit imaluunniit piginnittuusut tamarmik atugassarititaat assigippatigit.

Imm. 5-mut

Siunnersuutigineqarpoq ilanngaasiinissamut killiliisinnaaneq taamaallaat atuutsinneqartassasoq nakkutigisaasumik akiitsut 5 mio. koruunit qaangerpatigit aammalu ilanngaasiinissamut killiliineq atuutsinneqarpat taamaallaat nakkutigisaasumik akiitsunut attuumatinneqartut taakkua namminerisamik aningaasaatigisanut nuunneqarsinnaappata, aningaasaliissutit avataaneersut (akiitsut) aammalu ukiumi isertitaqarfiusup naanerani namminerisamik aningaasaatit pissutsit 2:1 assigippatigit.

Ilangaasiinissamut killiliinerup kingunerivaa nakkutigisaasumik akiitsoqarnermut atatillugu ernianut aningaasartuutinit aamma aningaasat nikerarnerisa annaasaqaataanerani ilanngaasiisinnaannginneq, selskabip imaluunniit peqatigiiffiup namminerisamik aningaasaatai nul-iuppat imaluunniit amigartoorutaappata. Illua'tungaanili (ilaannakortumik) nakkutigisaasumik akiitsup

namminerisamik aningaasaatinut nuutsinneqarpat, pissutsit taamaasillutik avataanit aningaasalersorneqarnerup (akiitsup) aamma namminerisamik aningaasaatigisat ukiup isertitaqarfiusup naanerani pissutsinut 2:1 qaangiinninnerani (t.i. selskabip namminerisamik aningaasaataasa akiitsut tamakkiisut minnerpaamik 33, 1/3 procentiinut assingulerpata), taava nakkutigisaasumik akiitsunut atatillugu sinneruttunut taakkunannga ilanngaasiinissamut killiliisoqassanngilaq.

Ilanngaasiinissamut killiliineq taamaallaat atuutsinneqassaaq nakkutigisaasumik akiitsunut tunngatillugu namminerisamik aningaasaatinut nuunneqarsinnaasortaanut, ilanngaasiinissamut killiliineq atuutsinneqassanngikkaluarpat. T.i. selskabinut atugassarititat assigiipput, apeqqutaatinnagu (ilaannakortumik) nakkutigisaasumik akiitsup namminerisamik aningaasaatinut nuunneqaraluarpat nuunneqanngikkaluarpalluunniit.

Suliffeqarfissuup iluani nakkutigisaasumik akiitsut eqqarsaatigalugit ilanngaasiinissamut killiliisinnaaneq atuutsinneqaaqassaaq aamma tamatuma kingorna inummut pingajuusumut nakkutigisaasumik akiitsoqarsinnaaneq tulliullugu.

Imm. 6-mut

Aalajangersakkani akiitsut eqqartorneqartut ilaatigut akiitsut § 17, imm. 1 aamma § 18, imm. 1 naapertorlugit pisassarianut akiitsut ilanngunneqarput aamma obligationit nikisinneqarsinnaasut. Akiitsuni selskabip akiitsui tamakkiisut naatsorsuunneqarput, taakkua selskabip iluani pisuuppata aamma inummut pingajuusumut atassuteqaqatiginngisamut pisuuppata. Tunngaviusumik aallaavik tassaavoq aningaasanut akiitsut pisassarisat sulluunniit ilaatinneqarmata. Aalajangiisuusorli tassatuaavoq inatsisitigut aningaasanik akiliuteqarnikkut piumasaqaateqartinneqarneq. Ilanngunneqarputtaaq aningaasanik pisassarisat sulluunniit apeqqutaatinnagu suunerinik, matumani ilanngullugit obligationit, pappiaqqat nalillit naqissuserneqarneri, aningaasanillu pisassarisat allat. Aamma erniaqanngitsumik aningaasanik taarsigassarsiat aamma pisassarisat akiitsortitsilluni tunisinermit aamma piffissamik naatsumik qularnaveeqqusiinngikkaluarluni aningaasanik attartortitsinerit il.il. aalajangersakkani ilaatinneqarput.

Akiitsut aamma namminerisamik aningaasaatit pillugit akiitsut pillugit naatsorsuusiormut attuumassuteqartut pineqarnerini, tassaavoq akiitsut, selskabip pigisap ukiup aningaasarsiorfiup naanerani takussutissiinikkut akiitsorisai. Oqaaseqatigiit aappaat malillugit akiitsut naatsorsorneqassapput ukiup naanerani aningaasat nikerarnerisa nalinganit. Akiitsut avataanit aningaasat nalingannit pisuuppat, danskit aningaasanngortinneqarnerannut nuutsinneqarnerisa selskabip pigisap ukiup isertitaqarfiusup naanerani aammattaaq naatsorsorneqassaaq.

Ukiumoortumik naatsorsuutini illikartitsinerit, akileraarutissat aamma iluanaarutisiat pillugit ilanngunneqanngillat ilaatigut akiitsut § 17, imm. 1 aamma § 18, imm. 1 naapertorlugu aningaasatut pisassatut taaneqanngimmata

Imm. 7-mut

Maleruagassap namminerisamik aningaasaatit naatsorsorneqarnissaat pillugu erseqqinnerusumik aalajangersarpaa.

Namminerisamik aningaasatit ukiup aningaasarsiorfiup naanerani naatsorsorneqassaaq pigisat nalillit tamakkerlugit niuffatigineqassasuugunik nalinginut nalilerlugit tunngavigalugit naatsorsorneqarnerannik, akiitsullu ilanngaatigalugit.

Ukiumoortumik naatsorsuummi akiitsut pillugit naatsorsuineri illikartitat ilanngunneqanngillat, akileraarutinut illikartitat aamma iluanaarutit, naatsorsuutit taakkua aningaasat nikerarnerisa iluanaarutigineqartarnerannit inatsimmi aningaasanit pisassatut ilanngunneqannginneri pequtugalugit.

Nunani allanit nakkutigisaasumik piginnittunit pigisat nalillit toqqaannartumik toqqaannanngikkaluamilluunniit aningaasaliissutitut atorineqartut, namminerisamik aningaasaatinut taamaallaat ilanngunneqassapput, aningaasaliineq selskabimi ukiuni minnerpaamik marlunni atuunnermigut piussaguni. Maleruagassap illua'tungilersimaassavaa, nunani allanit nakkutigisaasumik piginnittut akiitsunit pissutsit aamma namminerisamik aningaasaatit pissutsinut 2:1 annertoqqataannut ataallugilluunniit pinnginnissaannut, taakkua selskabip ukioq isertitaqarfigisaata naanngitsiarnerani namminerisamik aningaasaliissuteqarfīgippatigik, ukiullu tullissaata aallartinnerani utertillugit iliuuseqaqqunagit.

Kingusinnerusukkut paasinarsippat nunani allanit piginnittuusut namminerisamik aningaasaatinut akiliutaat selskabimi ukiut marluk inorlugit atuutsinneqarlutik piusimasut, tamannalu akiitsut pillugit pissutsini aamma namminerisamik aningaasaatit pissutsinut 2:1-init qaffariaateqarnerusimasut, taava ilanngaasiisinaanermut killiliineq atuutsinneqalissaaq. Ukiumi pineqartumi akileraarutitigut angissusiliineq qaqileqqinneqartariaqarpoq, taamaattorli imm. 4 naapertorlugu selskabi periarfissinneqassalluni takussutissiissuteqaqquneqarnissani, suliffeqarfissuup iluani aningaasanik taarsigassarsianik tunngaviusumik assingusumik aningaasalersuisoqarnera.

Imm. 8-mut

Piginnittuusut kalaallit nunaanni selskabit pigisat suliffeqarfissuarmut ataqatigiissumik nakkutigisarippatigut, taava maleruagassani 1-3-mut aalajangersakkat kalaallit nunaanni selskabit pigisat suliffeqarfissuarmut ataqatigiissumik tamanut atuutsinneqassapput (isumannaallisaaneq). Kalaallit Nunaanni selskabit pigisat suliffeqarfissuarmut ataqatigiissuunersut § 36a imm. 3-mi aalajangersarneqarpoq. Selskabit suliffeqarfissuit ataqatigiissuunersut paasissagaanni, taava selskabit imaluunniit peqatigiiffiit il.il. piginnittui taakkuusut pisassarisap pilerfiani imaluunniit piffissami kingusinnerusumi toqqaannartumik toqqaannanngikkaluamilluunniit aktiatigut aningaasaatigisat 50 procentiinik taakkualuunniit qaangerlugit pigisaqartut imaluunniit selskabini ataasiakkaani taasisinnaanerit 50 procentiinik amerlanerusunilluunniit pigisaqartut.

Kalaallit Nunaanni suliffeqarfissuit selskabit ataqatigiissut selskabit pigisaasa isumannaallisarneqarnerat isumaqarpoq, akiitsut pillugit aamma namminerisamik aningaasaatit imm. 1 naapertorlugu ataatsimoortillugit naatsorsorneqassasut.

Imm. 1 naapertorlugu akiitsut pillugit aamma namminerisamik aningaasaatit pissusaanni, kalaallit selskabiisa selskabini allani aktiatigut aningaasaliissutigisimasaat ilanngunneqassanngillat, taakkua tamakkiisumik naatsorsuinermi ilanngunneqartillugit, aammalu akiitsut pillugit taakkualu akunnerminni pisassarisaat pillugit. Imm. 4-imi maleruagassamut tapertaliisumik maleruagassaqanngippat, suliffeqarfissuaq selskabinik aningaasaliissuteqarluni pilersitseqqiinermigut namminerisamik aningaasaatinik akullatserissaaq, taassumalu saniatigut akiitsut pillugit aamma namminerisamik aningaasaatit pillugit pissutsit selskabini pigisaasuni ataasiakkaani allannguuteqaratik (tissaluttuliatut pissuseqalernermit taasaq/kaskade effekt). Soorlu assersuutigalugu nunani allani selskabi piginnittuusooq Kalaallit Nunaanni selskabi D1 aningaasalersorsimaguniuk namminerisamik aningaasaatai 1.000-inik aamma suliffeqarfissuup iluani taarsigassarsisitsinikkut 2.000-inik, selskabi taanna selskabimik allamik D2 pilersitsisinnaavoq namminerisamik aningaasaatai 3.000-iutillugit, taassumalu suliffeqarfissuup iluani aningaasanik taarsigassarsinissi 6.000-inut periarfissaqalersillugu, aammalu selskabimik allamik D3 pilersitsisinnaalluni namminerisamik aningaasaatai 9.000, taassumalu suliffeqarfissuup iluani aningaasanik taarsigassarsinissi 18.000 periarfissaqalersillugu. Aningaasat taarsigassarsiat tamarluinnarmik selskabimit nunatta avataanit atukkiussaapput. Ataqatigiissuni tamani pissutsinut 2:1-imut piumasaqaatit tamarluinnarmik selskabit ataasiakkaat atuutsippai.

Imm. 9-mut

Maleruagassanut siunnersuutaasumi siunnersuutigineqarpoq annikitsumik aningaasannguisarnarup pakkersimaartinneqarnissaanut aamma nunani allamiut selskabiutaasa nunatsinni aalajangersimasumik ingerlatsivimmik pilersitsineranni aamma peqatigiiffiit il.il. pissasoq. Taamaaliornikkut akileraaruserinermut tunngatillugu erniatigut ilanngaasiinikkut aamma aningaasat nikerarnerisa nalingisa annaasaqaataasinnaanerannut kalluinaveersarneqassaaq, taakkua annikitsumik aningaasalersuinikkut pinerisigut, qanorluunniit ingerlatsiveqarfik Kalaallit Nunaanni ingerlanneqaraluarpat Kalaallit selskabiutaannit aqunneqarluni imaluunniit aalajangersimasumik ingerlatsivimmit pisuugaluaruniluunniit.

Aalajangersimasumik ingerlatsiviup namminerisamik aningaasaataasa naatsorsornerani taamaallaat pigisat akiitsullu, aalajangersimasumik ingerlatsivimmut attuumassuteqartut ilanngunneqassapput.

Erseqqissarneqarpoq, nunani allanit selskabit Kalaallit Nunaanni aalajangersimasumik ingerlatsiviutillit pillugit annikitsumik aningaasalersuineratigut, taava nunani allanit selskabip qitiusumik allaffeqarfiat inummit pingajuusumit aningaasanik taarsigassarsinermi qularnaveequsiisimassammat, qitiusumik allaffeqarfik taarsigassarsianut

taarsiisussatut taaneqarsimappat. Aningaasanik taarsigassarsineq taamaattoq taamaammat nakkutigisaasumik attartornermik taasariaqarpoq.

§ 36d-mut

Imm. 1-mut

Siunnersuutigineqarpoq illersuutaasumik maleruagassamik pilersitsisoqassanerani, isertitat nikisinneqarsinnaasut akileraartitigut pitsaaqutigisinnaasaasa peernerisigut, soorlu assersuutigalugu ernianut aamma iluanaarutisianut attuumassuteqartut nunani akileraarnikiffiusuni selskabini pigisani inissinneqarsimasunut atatillugu. Nunanit allanit pisup selskabip aningaasaliissuteqartuusup aningaasalersuinermigut isertitarisai taamaammat Kalaallit Nunaanni selskabimi piginnittuusumi isertitanik naatsorsuinermi ilanngunneqassapput, selskabiutigisap nunani allani akileraarnikinnerusuni kalaallit nunaanni akileraartarnermut malittarisassanut sanilliullugu appasinnerungaatsiartumik akileraartinneqartillugu imaluunniit Kalaallit Nunaanni maleruagassanut sanilliullugu kinguartinneqangaatsiarsimatillugu. Akileraarusiineq taaneqarpoq CFC-mik akileraarusiineq "CFC-beskatning (Controlled Foreign Company)"

Aammattaaq siunnersuutigineqarpoq CFC-mik akileraarusiineq ingerlanneqarsinnaassasoq selskabip pigisap aningaasaliissuteqarnermigut pigisani ukiumi isertitaqarfiusumi agguaqatigiissillugu selskabip tamakkiisumik pigisaasa 10 procentii taakkualuunniit sinnerlugit pigippatigut. Ukiup aningaasarsiorfiusup ingerlanerani pigisat annertussusaannik agguaqatigiissitsinikkut naatsorsuisoqassaaq. Taamaasilluni naammaginatutut taasaanngilaq, selskabip pigisap ukiup aningaasarsiorfiusup naanerani pigisanit aningaasanik naleqanngitsunit pisut aningaasaliissutitut pissarsiarippagit taamaasiornermigullu ukiup aningaasarsiorfiup naanerani pigisat aningaasaliissutaasinnaasut nalingi 10 procentinit minnerulersillugit.

Peqatigiiffik pisut pinerisigut inummit imaluunniit inuttut inatsisitigut akisussaasuseqartumit pigineqarsinnaanngillat, kisiannili inuup imaluunniit inuttut inatsisitigut akisussaassusillip peqatigiiffik aqutsinikkut nakkutigisinnaavaa peqatigiiffiup malittarisassaasigut imaluunniit ilaasortanik allanik isumaqatigiissusiornikkut.

Nunatta avataanit pisut selskabet aamma peqatigiiffiit aqunneqarnerisigut nakkutiginninnerup taakkununnga, CFC-imik akileraartitsineramik pilersitsisinnaavoq. Namminersorlutik inuttut inatsisitigut akisussaatinneqarsinnaasunut tamanut, Kalaallit Nunaanni namminersortutut akileraartartutut taaneqartunut maleruagassat malillugit peqquteqartitsisoqarsinnaasoq CFC-imik akileraartitsinermut.

Naggataatigullu siunnersuutigineqarpoq CFC-imik akileraarusiineq ingerlanneqarsinnaassasoq, nunatta avataani selskabi appasissumik akileraartinneqarpat. Nunatta avataani selskabi appasissumik akileraartinneqarnersoq



aalajangerniartillugu, tamanna isertitanik annertussusiliinermi ataasiakkaatigut naliliinermik tunngaveqassaaq.

Aalajangiiniarnermi siullertut naliginnaasumik nalilersuineq Kalaallit Nunaanni akileraaruseeriaaseq pineqartumut sanilliunneqarsinnaanersoq. Tamanna atuutsinneqarpat pisuni ataasiakkaani naliliinermik tunngavissiortoqassaaq selskabi pineqartoq isertitamigut immikkuullarissutsi tunngavigalugu aamma maleruagassat immikkuullarissooriataarsinnaaneri, kalaallillu maleruagassaanit allaanerussuteqarneri peqqutigalugu Kalaallit Nunaanni akileraarnissaraluanut sanilliullugu appasinneersuarmik akileraarnersoq.

Naliginnaasumik nunatta avataanit selskabi akileraartussaasutut isigineqartarpoq, nunatsinni maleruagassanit annertuumik appasinnerunngitsumik, selskabi 22,5 procentit taakkualuunniit qaangerlugit akileraartinneqaraangat, taannalu nunatsinni selskabet akileraarutaannit 30 procentiusumit pingajoraarterutaalluni.

Aammattaaq piumasqaataavoq aningaasarsiat akileraaruteqaataasussat naatsorsorneqarneranni nunatsinni maleruagassat malillugit allaanerussuteqangaassannginnerannik. Selskabi taamaammat maleruagassanit pitsaanerusunik atortinneqassanngilaq soorlu assersuutigalugu isertitat naatsorsornerannut maleruagassani.

Selskabit akileraarutaasa aqqissuussaanerisa nalilersuutiginiarneranni, taakkua isertitaqqortussusaat aallaavigalugu tunngaveqartuni, isertitaqqussutsit allattorsimaffiat tamakkiisumik nalilersuutaassaaq, matumani procentip annertussusilerneqarnerata killilerneqarnera. Selskabi pigisaq taamatut akileraartinneqartarpat, isertitat nikerarneri peqqutigalugit "suussutsiminit" allannguuteqartinneqarnaviannngilaq.

Nunatta avataani akileraartitsineq toqqaannartumik isertitanit akileraartitsinerunngippat taanna annertungaatsiartumik allannguuteqartitsinertut isigineqartariaqarpoq, illua'tungaanili assersuutigalugu akileraartitsineq akitsuusiinikkut imaluunniit assigisaasigut pippat, isertitat annertussusaannut ataqatigiissinneqarsinnaanngitsumik pippat. Aammattaaq atuuppoq akileraaruseriaaseq aningaasaatit tunngavigalugit procentimik akileraartitsinermi.

Nunatta avataani selskabet akileraarutaasa aqqissuussaananik tamakkiisumik nalilersuinermi malitsigissavaa, nunatta avataani selskabip akileraaruserneqarnera, piffissami aalajangersimasumi taasami Kalaallit Nunaanni selskabip assinganit akileraaruserneqarneranit allaanerunngitsumik, taamaakkaluartoq akuerineqarsinnaannginneranik, nunani allani selskabinit akileraartitseriaaseq aalajangiisuulluinnartumik kalaallit akileraartitseriaasaannut allaanerussuteqarnera peqqutigalugu, taamaammallu qulliusutut isigalugu akuerineqarsinnaassannginneranik.

Nanatta avataani selskabet akileraarutaasa aqqissuussaananit allannguuteqartitsinerni soorunalimi sunniuteqarsinnaavoq, selskabimit pigisamit

iluanaarutit pissarsiat nunami allamiittumi tamatuma kingorna kalaallit maleruagassaanit allaanerungaatsiartutut nalilernerqarsinnaassanerani.

Tunngaviusumik tamakkiisumik akileraartitseriaatsip pineqartup nalilersornerani kinguneqartitsissappat, tamakkiisumik kalaallit akileraartitseriaasaannut assingutillugu, taava selskabi pineqartoq pillugu pisuni ataasiakkaani akileraartinneqarnera naliliissutigineqassaaq.

Naliliineq tamanna aallaaveqassaaq selskabip immikkuullarissumik isertitamigut aaqqissuussaanerata aamma maleruagassat immikkuullarissuusinnaanerisa, taakkua kalaallit maleruagassaanut allaanerungaatsiarlutik, taava selskabimik pineqartumik taamaatsillugu kalaallit akileraartitseriaasaannit annertungaatsiartumik appasinnerutinneqassaaq.

Selskabip piffissami pineqartumi nunanut allanut akileraarutaa immineq aalajangiisuunnigilaq, kalaallit maleruagassaanut allaanerungaatsiarneranut nalilersuuteqarnermi. Tamanna peqquteqarpoq selskabip piffissami pineqartumi maleruagassanit tunngaveqartumik soorlu assersuutigalugu akileraarutissaraluaminik kinguartitsigallarsinnaanerani, kalaallit maleruagassaanut assingusumik pisoqarnerani, assersuutigalugu amigartooruteqaatinik nikisitsisinnaanermi, nalikilliliinertigut assigisaatigulluunniit. Taamaammat nalilersuisoqartariaqarpoq ukiuni aggersuni akileraarutitigut akiliutaasussaasut aallaavigalugit.

Nunatta avataani selskabi pigisaq ilaatigut assersuutigalugu ukiuni arlaqartuni nunami pineqartumi selskabet akileraartinneqartarnerisa aaqqissuussaanerat tunngavigalugu immikkut aaqqiissuteqarfigineqarsimasoq, kalaallit maleruagassaat malillugit selskabimut assingusumut naleqqiullugu selskabi pineqartup tamakkiisumik akileraarutaat annertungaatsiartumik appasinnerusutut taaneqassapput, piffissami taaneqartumi selskabi annikinaarlugu akileraaruserneqartutut nalilernerqassaaq.

Imm. 2-mut

Selskabi il.il. Nunanit allanit pisutut isigineqassaaq, kalaallit maleruagassaat malillugit maani nunaqavissutut isigineqanngippat. Selskabi il.il. Kalaallit Nunaanni maleruagassat atuuttuusut malillugit nunaqavissutut isigineqassaaq, Kalaallit Nunaatali nunat allat marloriaammik akileraannginnissaq siunertaralugu isumaqatigiissuteqarfigisaani nunami allami angerlarsimaffeqartutut isigineqartoq, aamma isigineqassaaq selskabi nunanit allanit pisutut.

Imm. 3-mut

Siunnersuutigineqarpoq selskabip pigisap pigisaasa aningaasaliissutigineqarneranit naatsorsuinerit naatsorsuutit malillugit nalit tunngavigalugit naatsorsorneqassasut. Tamatumunnigali ilaatinneqanngillat pigisat tigussaasuunnigitsut, taakkua niuffatigineqassasuugunik naliinut naatsorsuutigalugit ilanngunneqartussat. Tamanna tunngaveqarpoq pigisat tigussaasuunnigitsut naliginnaasumik naatsorsuutini nalit tunngavigalugit naatsorsuunneqartanngimmata, tassa pigisat

pilersikkiartuaarneqartut taaneqartariaqarmata, soorlulu pigisat tigussaasuunngitsut nalingisa qaffariaataat pissarsiarisat naatsorsuutini ersersinneqartanngitsut.

Imm. 4-mut

CFC-mik akileraarusiinissamut piumasaqaatit atuutsinneqarpata, taava selskabip pigisap isertitai piffissami pineqartumi selskabip piginnittup annerpaamik toqqaannartumik imaluunniit toqqaannanngitsumik aktiatigut uninngasuutaasa annertoqqaataanut naatsorsuutigineqassapput. Taamaattorli selskabip pigisap aningaasaliissuteqarnermigut isertitaanut attuumatinneqassapput piffissami taasami CFC-mik akileraarusiinissamut piumasaqaatit atuutsinneqarfiani, selskabip piginnittuusup isertitaasa naatsorsuiffigineqarneranut ilanngunneqartussat.

Taamaallaat selskabip piginnittuusup selskabimit pigisaminit inernerusup iluanaarutitaqarfigisaanit pisut ilannguttussaavai. Selskabimi pigisami amigartoorutaasimasinnaasut selskabimut piginnittumut nuunneqarsinnaanngillat. Amigartoorut taama ittoq kisimi selskabimi pigisami taamaallaat isertitaanit ilanngaasiinikkut atuinermi ukiuni tulliuuttuni tallimani ilanngaatigineqarsinnaapput, tak. imm. 6.

Selskabip pigisap isertitaasa naatsorsuusiorfigineqarnerat selskabip piginnittup ukioq naatsorsuusioruusaatitaaffia malillugu naatsorsorneqassaaq. Selskabip piginnittup selskabimi pigisami aktiat tamakkerlugit piginngippagit, selskabip piginnittup ukiumi isertitaqarfiusumi selskabip pigisap annertoqqaatai naatsorsuutigalugit ilanngunneqassapput. Selskabi piginnittoq aktianik pissarsippat imaluunniit tunisaqarpat, piffissami pineqartumi pineqartuni annerpaaq ilanngunneqassaaq.

Selskabimi piginneqataassutsit CFC-imik akileraartitsinermik tunngaviusut toqqaannanngitsumik pigineqarpata, imaluunniit piginneqataassutsit toqqaannartumik toqqaannanngikkaluamilluunniit ataqatigiisumik piginneqataassutaappata, piginneqataassutsit naatsorsornerani pissutsit piginneqataassutsit tunngavigalugit aqutsinikkut nakkutigisaasumik iliuuseqarneni aalajangersakkat assigalugit atorneqassapput, tak. qulaani eqqartorneqarnera.

Aktiaatit tamaasa imaluunniit aktiaatit amerlanerpaat tunineqarpata selskabillu piginnittup selskabimik pigisamik nakkutiginnikkunnaarluni, taava selskabip piginnittup piffissami nakkutiginniffiani taamaallaat selskabip pigisap isertitani pissarsiani ilanngutissavai. CFC-mik akileraarusiinissamik piumasaqaatit selskabip piginnittup ukiumi isertitaqarfigisaata ilaannaani, piffissami tassani piffissami naatsorsuusiornermik ingerlatsineqassaaq.

Imm. 5-mut

CFC-mik akileraarusiineq taaneqareersutut pakkersimaassavaa, isertitai nikerartinneqarsinnaasut nunani allani akileraarutinit pitsaaquserneqannginnissaa anguniarlugu. Taamaammat isertitai suunerinik immikkoortiterineqassaaq taakkua Kalaallit Nunaata avataani ajornangitsumik inaalinneqaqqunagit. Erniat, pappiaqqat nalillit aningaasat nikerarnerisa iluanaaruteqaataat, nunani allani selskabinit

iluanaarutit, aktiatigut pissarsiat, atuisinnaanermut iluanaarutit ataasiakkaat aamma aningaasanik attartortitsinermit isertitat pillugit. Aningaaseriviit aamma sillimmasiisarfiit tassaapput suliffeqarfiit naliginnaasut aningaasanik isertitat nikerartinneqarsinnaanerinnik ingerlatsisinnaasartut, isertitat taamaattut nunat akunnerini ajornangitsumik sullissigasuarnikkut isertitsiffigineqarsinnaasuummata. Aammattaaq selskabeqarpoq allanik isertitanik nikerartinneqarsinnaasunik ingerlassaartunik, soorlu assersuutigalugu aningaasaliissuteqarnissamut aamma ileqqaaruteqarnissamut suliffeqarfiit selskabiusut aamma taarsigassarsisitsisarfiit. Selskabit tamakku aningaasanik attartortitsinikkut isertitaqartartut ersarissumik taaneqarput qulakkeerumallugu, Kalaallit Nunaanni isertitanit naatsorsuinermit aammattaaq illikartitanut ilanngaaserneqarsinnaanissaat siunertaralugu soorlu aamma CFC-mik akileraaruserneqarnissaannut akiliuteqarnissamut nalilersuuteqarnermi, soorlulu CFC-mik isertitanik akileraaruteqaataasussanik naatsorsuinermit ilanngussinissaannik.

Siunnersuutigineqarpoq maleruagassamik ilanngussisoqassasoq suliffeqarfissuit iluini nakkutigisaasumik iliuusaanngitsunit pigisanik tigussaasuunngitsunit pisut, selskabet pigisat namminerisamik ilisimatusarnermut aamma ineriartortitseqqinnissamut ingerlatsineranut atatillugu pinngitsoortitsinissamik atorneqarsinnaasumik. Tassami pigisat tigussaasuunngitsunit piginnaatitaaffiit selskabinut pigisanut nuunneqartanngillat kisiannili selskabimit pigisamit ineriartortinneqarsimasarmata. Isertitat pigisanit tigussaasuunngitsunit pisut CFC-mik isertitatut isigineqartanngillat. Pinngitsoortitsinissamik maleruagassamut ilaatinneqanngillalli suliffeqarfissuit iluini atuisinnaanermut iluanaarutit, tassami pinngitsoortinneqartariaqarmat suliffeqarfissuit iluini akileraarutitigut eqqarsaateqartoqassanngimmat, ilisimatuussutsimut immikkoortortat nunanut akileraarfikinnerusunut nuunneqarnissaannik pilersaarusiortoqarnissaanik taakkunani atuisinnaanermut isertitat akileraaruteqaataaffiunngimmata aamma atuisinnaanermut akiliutit ilanngaatigineqarsinnaaffianni taakkua suliffeqarfissuit ataqtigiissunut atasut, tassunga atatillugu suliffeqarfissuit iluini ataqtigiissut atuisinnaanerinit akiliutit akitigut aalajangersaavigiuminaareeqimmata.

Pigisat tigussaasuunngitsut pillugit atuisinnaanermut piginnaatitaaffiit OECD-p marloriaammik akileraannginnissamik isumaqtigiissusiortarneranni maleruagassaasumi atorneqarputtaa.

Imm. 6-mut

Siunnersuutigineqarpoq selskabinut pigisanut atatillugu CFC-mit isertitaanit amigartoorutaasimasinnaasut ukiumi amigartooruteqarfiusumi ukiunut aningaasarsiorfiusunut tulliusunut ilanngaatitut atugassanngorlugit nuunneqarsinnaassanerannik, taakku maleruagassap § 30-mi CFC-mik akiliuteqartussat naapertorpagit.

Imm. 7-mut

Siunnersuutigineqarpoq selskabinut pigisanut akileraarutitigut akiliutaanut appaasoqarsinnaanerani (akiitsortitsinermit iluaqusiineq) isertitanit aningaasalersuinernit ingerlatsinikkut pilersitanut.

Imm. 11-mut

Allannguutip, aappariit katissimasut ataatsimut akileraartussaanerata atorunnaarsinneqarnissaanik siunnersuutip malitseqartinneratigut kingunerivaa.

Nr. 12-mut

Allannguneq aappariit inooqatigiittut ataatsimut akileraarusigaasarnerisa atorunnaarsinneqarnissaanik siunnersuutip kingunerisaraa.

Nr. 13-imut

Allannguneq aappariit inooqatigiittut ataatsimut akileraarusigaasarnerisa atorunnaarsinneqarnissaanik siunnersuutip kingunerisaraa.

Nr. 14-imut

Allannguneq aappariit inooqatigiittut ataatsimut akileraarusigaasarnerisa atorunnaarsinneqarnissaanik siunnersuutip kingunerisaraa.

#### *§ 2-mut*

Siunnersuutigineqarpoq Inatsisartut inatsisaat ukioq aningaasarsiorfiusoq 2008-miit atuutilissasoq, taamaattorli annikitsumik aningaasaliinermut, CFC-imik akileraarusiineq pillugu aamma akeqartitsinermit nuussinerni maleruagassat killilersimaarneqarnissaannut sukaterutaasumik aalajangersakkat pillugit, § 1, nr. 10 malillugit aalajangersakkat 1. maj 2007-imiit atuutilissasut, siunnerssutip pisorta qarfinnut aamma kattuffinnut tusarniaassutigalugu nassiunneqarneraniit, aamma siunnersuutip Akileraartarnermit Pisorta qarfiup nittartagaani tamanit takusassiarineqarneraniit atuuttussanngorlugit.

Taamaasilluni inatsimmi aalajangersakkat pineqartut tunngaviummik Inatsisartut aalajangiinneraniit aammalu kinguneratigut pisortatigoortumik saqqummiunneqarneraniit sioqqutsilluni atuutsinneqalernissaat qulakkeerneqassaaq.

Taamatut iliuuseqarnikkut akileraartussaaitat, maleruagassat killilersimaarneqarnissaannut sukaterutaasumik eqqorneqartussaasinnaasunut atatillugu, siunnersuummik ilisimasaqareernertik tunngavigalugu tamannalu aallaavigalugu inatsisip 1. maj 2007-imiit atuuttussanngortinneqanngippat,

siunnersuummi maleruagassat naapertorlugit aaqquussisinnaanissaat taamaasillutillu maleruagassat nutaat naapertorlugit akileraaruserneqarnissaminnik pinngitsoortitsinissaat pinngitsoortinneqassaaq.

Akileraartussaaitanut siunnersuummi aalajangersakkat avaqqullugit iliuseqannginnissaat qulakkeerniarlugu taamaammat pisariaqarpoq inatsisip atuuttuulersinnissaa ullormi siunnersuutip saqqummiunneqarfianiit 1. maj 2007-imit pissasoq.

Inatsisip ullormi 1. maj 2007-imit atuutsinneqalernissaanut inatsisitigut illersuutaasunik isumaliuutersuutaasunut tunngatillugu, illua'tungilerneqarput, kikkunnulluunniit maleruagassat nutaat aamma killilersimaarneqarnissaannut sukaterutaasumik aalajangersakkat qulaani taaneqartumit tusarniaassutigineqarneranit aamma siunnersuutip Akileraartarnermut Pisorta qarfiup nittartagaatigut tamanit takusassiarineqarneraniit ilisimaneqalereernerannik.